

徽尚齋詩集



832273

徵尚齋詩
初集四卷



同治甲子仲秋
廬州郡參軍刻

國朝吾鄉詩人以陳午亭相國吳蓮洋徵君稱首同時
傳青主馮秋水諸先生皆卓然名家自時厥後作者輩
出近以詩名盛京師者則余交游中魯川先生其一也
先生爲秋水先生後人弱冠成進士官刑部與黃海華
慶伯蒼爲文字交最早及見上元梅先生伯言復與吳
子序朱伯韓余小頗陳懿叔王少鶴諸君子從之游以
文字切劘嗣又從吾鄉張石州先生研究實學及商抑
之何願船王顧齋爲友一時交游最盛梅張先後歸道
山諸君子亦稍稍散去先生獨畱京師余丙辰通籍後
因顧齋得識先生兼與許海秋林穎叔黃翔雲趙沅青
諸君子詩酒往來無虛日辛酉春先生以秩滿
簡守廬州行有期矣自言官長安二十餘年惟師友之
樂強人意耳後此恐不復得時事不可知卽區區詩文
作輟亦皆在不可知之數余感斯言因段先生詩錄其
副以付剗劘旣成還質先生遂書交游緣起如此若先
生之詩先生固自知之卽世亦必有知之者余固不容
贅一辭云洪洞董文煥

余已酉以前詩皆經梅先生點定是年秋先生南歸自後所作以計簿餘紙錄爲草本未敢輒示人辛酉秋研秋檢討假觀遽以付梓其意可感也然滋余媿矣咸豐十一年七月馮志沂識

卷一

古今體詩七十七首

卷二

古今體詩八十九首

卷三

古今體詩五十二首

微尚齋詩集序

卷四

古今體詩九十四首



微尚齋

微尚齋詩集初編卷一

代州 馮志沂

乙未至庚子

微尚齋

固關道中

垂鞭歛帽井陘西鄉思
蒼騰旅望迷落日下隨荒草盡
秋禾高與遠山齊家如社燕
秋常別身似寒鴉暮未棲
此地從來天下險
征人幾見息輪蹄

山行

散轡尋踪去緣村渡小溪
雲扶孤塔直天壓遠山低
寺近鐘先報峯回路欲迷
坐憐佳境過無計遂幽棲

微尚齋詩集卷一

一

居庸遇雨

霧重羣峯失沙平一徑通
行人與歸鳥相遇溼雲中

古意

晨鏡彎修蛾螺黛慵復掃
妝罷發微嘆悵悵思遠道
非敢怨別離私憐容色好
歡會當有時紅顏豈長保
芳年託蹇修追思良草草
寄語垂髫人婚姻慎毋早

出都

連天風雪出長安殘醉朦朧耐曉寒
昨夜玉筍銀燭畔月明猶怯捲簾看

疏雨

而先生之詩其乃
寶劍也讀竟愛
德教於光頰

云

余酷愛魯川
先生詩內凡小
樣因以此卷兒貽

並云六寶劍贈
与烈士之素余雖
不敢當烈士之稱

疏雨咽殘漏孤懷覺夜長
燈前花影瘦窗外葉聲涼
薄醉猶能致沈憂不可忘
來朝休看鏡元鬢恐成霜

謁告

謁告經旬晝掩關秋風吹雨滿
長安展書唯覺古人好
得酒豈知來日難虛擬飛騰酬壯歲
未妨疏拙稱閒官
卻思嶺海傳烽急挂壁龍淵倚醉看

郊行

久不向郊郭焉知秋已深
頽陽依遠堞寒色變平林
搖落中年感蒼茫日暮心候蟲誰聽汝
辛苦獨悲吟

辛丑至甲辰

微尚齋詩集卷二

二

九月十二日作

嶺海烽煙又浙東羽書夜半達深宮
宵衣誰遣勞明主專闕頻聞策上公
此日天心應悔禍嚮來廷議但和戎
膳黃詔下三軍泣早晚舟山看掛弓

同人夜集伯言先生寓齋

勝侶無煩折柬呼盤飧風味似山廚
在官共有閒居樂好事誰摹雅集圖
人慕劉臻稱作聖我逢穎士願爲奴
長安壇坫須公等莫厭黃塵憶五湖

卽事賦呈伯言先生

我貧非慕鄭莊俠客來頗亦無畱門
棋流數輩日相過

酬對徃徃窮朝昏人疑我近意癖此長者車至多旋轉
余君朱君入我室見客頻顛俱無言頓思城西有隱宦
門閒喜得談天賓屬客安坐竟借出客方爭路喧不聞
到門徑入忽愕顧主人盛服賓初筵避客不謂反遭客
相看氣索辭欲還主人笑謂不須爾我自欵客君無關
延坐別室得幽憩如魚脫罟鳥出樊長鬚解事耐奔走
爲熬爐火傳盤飧似知坐上有飲客酒盡輒續餅鬪翻
夜深客去主人入相與撫掌開心顏此生作達自天性
世所怪笑心所安各拈新句紀今夕來朝更約追餘歡
三哀詩

微尚齋詩集卷一

三

范近薇先生

范侯古循吏愛士心鄭重識我稿人中獨舉不謀眾淋
漓東閣讌寂寞西州慟盛衰理久知銜恩獨增痛

李海瞻

海瞻吾中表奇氣隘一世遺榮在邱壑傷命緣文字既
摧李賀年更奪鄧攸嗣造物知有無招魂儻來至

家少菊

少菊吾宗秀刻苦爲文章一第未入手賫恨歸北鄙從
來骨肉間賢者多憂傷蔓草滿平原幽蘭隕孤芳

贈余小頗戶部

我初與君未相識。王君示我君翰墨。退舉君名詢所知。
毀譽參差對以臆。我排眾論亟請見。懷刺雖投心惕息。
方憂覲面遽移牀。豈意通名容接席。不可爲師許爲友。
詩卷丹黃不遺力。爾後形骸兩無閒。載酒論文忘朝夕。
詞鋒精悍我猶怖。宦境蹉跎世誰惜。比來守口欲如餅。
廣坐羣譁常獨默。惟值吾曹文酒場。談天斫地狂猶昔。
前年挾策干大帥。擬請長纓殊未得。綢繆家國豈無人。
聊浪文章差有益。相期蘊首共筆硯。近喜居鄰揚子宅。
敢云追逐比雲龍。劣可汗流同湜籍。他年一笑謂鯁生。
不遇老夫猶弄戟。

微尚齋詩集卷一

四

登妙峯

長松偃蹇山屣屨。倚空矗立如懸梯。回旋三百六十級。
絕頂上與浮雲齊。我來山下日卓午。林風颯颯藍輿欹。
忽如舟行上急瀨。長篙巨石相撐搯。蜿蜒一綫入空碧。
後迷來徑前無蹤。輿夫邪許亦良苦。據石暫憩還嗟咨。
平生覲面等胡越。此際相倚同安危。斂昏堦盡得峯頂。
入寺再拜潛致詞。自知賦命甚窮薄。此行無恙邀神施。
世途杳杳未徧歷。苟免顛越無它祈。登輿卻走下絕壑。
微茫夜色迷東西。峯頭燈火出天半。繁星掩映交參差。
歸途惘惘若夢寐。濟勝無具良自嗤。黃塵烏帽固爲苦。

布襪青鞋甯獨宜。此生位置任天意。倒身一臥忘饑疲。

題孔繡山年丈尺五莊錢春圖
山館飛花泛酒卮。旗亭風絮颺鞭絲。詩人去後春無主。
趙李經過又一時。

輓伯蒼

君年始三十胸有萬古悲。流俗謂不祥而今果至斯。君
昔在郎署氣欲驂雲馳。才高寡所諧名至謗亦隨。顧獨
遇我厚謂我能文。詞恐我宦不達畢力相挽推我慙。反
咎君謂君無以爲人生各受性冷煖固異宜。君意了無
忤厚我逾曩時。我昔喜高論泛若無當卮。醉蘄每過差

微僑齋詩集卷一

五

君聽無不移君家門列戟遠在城東陴。相憶輒命駕卜
夜窮酣嬉童僕倦不應衾褥手自持平生行天下得此
非所期乖逢信天賦。迫子使我辭相報無可爲已矣長
相思。

雨後

鄰春斷續閒疏礎。雨後新苔長砌陰。暫得晴明轉蕭瑟。
西風併力作秋深。

送陳懿叔南歸

君家故多才。叔子最挺出。謂廣往余未相知。邂逅遂南
北。前年始識君。立談見肺腑。名論如鍼砭。往往起余疾。

匪唯文字契麴蘖亦同癖朝酣子野家暮集揚雄宅車
馬熟門巷童奴忘忘主容胡又棄我去戒途在旬日命酒
暫爲歡別語終在臆平生坐疏嬾事事成追惜願君究
素業庶用慰離索

雨赴圓明園

夜枕愁聞雨出門晨漏催山樓雲慘澹石路水喧騰趨
走眞違性浮沈轉費才衝泥三十里飢渴復歸來

卽事

眼色傍孤吟書牀供倦倚雨久不聞聲輕寒度窗紙

游西山登寶珠洞寺樓呈勵泉子山雲笏

微尚齋詩集卷二

六

我居湫隘近市塵時時閉戶數屋椽茲樓忽上始奇絕
百里煙樹朱欄前陰崖下瞰不見底咳唾直落長松顛
北直昆明望玉泉湖如杯水山一卷朝陽東升作光怪
地盡不辨雲與山老僧衣敝兒樸野略詢姓字無周旋
等游方外豈異性境殊暮寂情爲遷吾黨終年逐簿領
將毋面目非林泉山靈不瞋我亦媿覩路欲下心茫然
峯巒步步若相送深澗霜葉爭春妍溪山如此徑歸去
明日馬蹏塵土間

夢伯蒼

傳聞病骨久支離握手驚看似昔時檐雨如繩殘燭暗

夢回重展哭君詩

劇藥圖爲勵泉題

每看遺挂發悲吟。寫入丹青更不禁。莫向空庭覩行跡。
藥畦風雨落花深。

乙巳

乙巳三月二十五日伯言先生六十生辰同人觴集龍

樹寺次邵位西舍人韻二首

先生隱於文。眾妙出真靜。宗風繼方姚。筆力破餘境。身
無更事牽。眼爲異書炯。謗譽亂眾咻。何異蛙與黽。賤子
聞名來。幸得免磨屏。奇文許商榷。疑事輒咨請。匡時願

微尚齋詩集卷

七

已達造士心。未冷不惜提命勞。庶使聾聵警。耄耄視聰
彊風雅。賴持秉。

良會集簪裾。談諱趣彌靜。酒熟豔陽天。坐對雲林境。脫
身簿領勞。瞻矚暫清炯。翩翩簾度燕。閣閣池吠鼯。天機
自洋溢。塵慮悉芟屏。卻念修謁初。陳余同造請。楚水及
巴山。迢迢暮雲冷。歡筵觸離思。酒懷爲一警。暝色下西
山。夜游燭宜秉。

爲朱建卿題保石圖

自序略云石幾爲有力者攫去建卿尊人茱堂年丈
方五歲抱石泣不食石得存

石兄磊磊清且癯，編爛古色充堦除。何人妄欲負以趨，重如九鼎不可昇。護持豈有神鬼俱，淚痕手澤苔模糊。平泉片石古所獻，良嶽輦載來燕都。方君此石良不如，願君慎守同璠璣。石交難逢此其徒。

送別陳頌南給諫

士論同聲惜此行，遠心早共白鷗盟。買山孰隱誰資祿，微罪休官豈近名。聖主終應思賈誼，諸生可待訟

陽城。東南幸復銷氛警，無限滄浪好濯纓。

丙午

夜直

微尚齋詩集卷一

八

草滿空堦雨沒扉，庭無車馬吏人稀。文書映燭牛毛細，簾幙搖風豹腳飛。閒託微詞聊自喜，靜思吾道豈終非。十年但索長安米，漫與侏儒較飽饑。

友人贈竹百許竿，訓以詩

京師苦粟貴，竹更貴於粟。百錢買一竿，大者不盈握。幽人可相贈，似欲砭我俗。大車拙載來，新晴土方溽。位置密，疏灌漑約童僕。一畦種未徧，早覺空庭綠。破壁忘，欹斜荒徑增繚曲。能教明月碎，更使清風足。此惠非錙銖，平生好幽獨。得酒百不問，矧乃居有竹。已儲木柄鑿，新筍未可斲。且擬聽秋聲，虛窗夏寒玉。

送程伯專教諭之官雞澤

別期今始屆。別緒先已苦。惘惘旬日中。相見了無語。嗟
余寡聞見。末技慚刻楮。一第雖先鳴。勝人猶不武。得子
真益友。不在弟子伍。如何遽言別。豈不懷索處。古人重
贈言。蓄意聊一吐。方今士所賢。往往異於古。異道不相
謀。謂彼何足數。所惜英俊姿。不免老成侮。町畦分漢宋。
得失笑齊楚。海內求學人。晨星僅三五。雖當絕標榜。忍
更分門戶。願子抉其藩。有長期必取。又聞秉鐸地。風俗
異鄒魯。士氣繫師儒。名尊職當舉。短景惜分攜。長言忘
覩縷。朝曦將戒途。何術能留汝。

微尚齋詩集卷一

爲何子貞同年題王蓬心山水次韻

何君作書不肖俗力追斯邈。輕鍾玉偶然作畫亦奇絕。
正如史筆兼三長。古今名跡力蒐討。秘閣藏皮綾錦裝。
鑒別書畫若相馬。凡在廐者皆乘黃。國朝畫家寫山
水。婁東王氏推擅場。羨君無意得此本。豈與時價衡。低
昂峯迴嶂。復蹊徑泯展紙惟見煙嵐蒼。想其下筆絕依
傍。心師造化通混茫。此中儻許結茅屋。未覺身世非義
皇。故鄉亦有好山水。有溪可漁土可桑。十年羸馬走京
國。還君此畫心。仿得何當歸。臥萬峯頂靜聽松風聲。殷

丁未

病起巡圃

藥氣茶烟破宿醒
散衣巡圃賞新晴
榮枯不解東風意
瘦竹蕭疏草怒生

贈王丹麓

昔年投筆慕功名
曾備征南幕府行
磨墨生風晨草檄
輕裝乘月夜窺營
飄零部曲青衫在
牢落江湖白髮生
且喜酒狂猶少日
醉提長劍擬機槍

初秋

客至顏一開
客去憂千結
微風下庭樹
感此初秋節
退

微尚齋詩集卷一

十

耕生計荒進
取吏才拙不及
冥飛鴻背人入
寥沈

絕句

竊鈇妄意人伐國
乃咨我蕭育信男子
詣曹何不可

朱伯韓侍御將歸桂林出其尊人韞山先生詩卷見示

卽用原韻送別

便脫朝衫買釣槎
舳舻回首戀京華
屢陳讜議翻辭祿
共賞奇文欲滿家
招隱有誰吟桂樹
還山剛及看梅花
陽城尙遜知幾早
漫擬朝堂壞白麻

九日集顧祠餞伯韓分韻得禊字

佳辰重九節
勝地城西寺
祠宇緬先賢
壺觴集同志
朱

君急裝來軒軒踞賓位自言得請歸明將理芒屨有容
揚解言問君去何意君昔抗短疏慷慨無所避平生胸
中書鬱爲不平氣雖不見施用亦未遭屏棄朝廷方
需賢引退儻非義君唯復否否吾無上書事自維慵且
疏又病骨不媚於時百無補入決歸山計離羣豈不念
眷拙欣可遂人言子無聽今者吾已醉他年重會此更
續蘭亭祿

贈黃海華司馬

君宦湘南我京國歲歲傳書道相憶豈期今夕一尊酒
還共青燈話曠昔居停主人久宿草

徵尚齋詩集卷一

十一

肉食一官五載猶待次渥然丹顏欲黧黑新詩雅善繪
物情讀未終編三歎息天生騏驎合千里芻秣不豐咎
誰執比者朝官多慕外未信枉尊難直尺九閭漸遠不
可叫往往夷途結荆棘市中有虎洵可畏田者傷麟憤
堪泣我亦十年溷郎署近覺行能愧官職名場中外各
艱難人生適意何由得君家小阮工綴文佳處寢與前
賢逼因風爲我數寄聲文字須求世人識

得黃子治書卻寄

賦別猶如昨書來已隔年客程黃鶴外詩思白鷗前
宦懶吾拙論文覺子賢東齋修竹裏塵榻至今懸

戊申

元日試筆用坡公除夜韻

七十古謂稀奄忽欲過半爆竹驚曉眠攬衣起長歎蚤
年事嬉游歲月恣愒玩酒徒感存歿深友嗟聚散逐逐
人海中羣行獨無伴太倉果枵腹官書讀城旦晨出暮
得歸文簿復堆案客來詢新知強以它語亂寸心蒙萬
垢無術自湔盥有如衰疾人延頸望和緩窮年計薪米
愈益疏講貫平生邁往氣斂抑就衰俛結習苦未忘五
中倏冰炭行將棄此去遠築忘憂館驚鴉繞寒枝移巢
詎云爨誰能知許事得酒笑當粲

春日卽事

微尚齋詩集卷一

十一

春來真有酒如澗倦睡頻忘曉日升車馬經過殊未已
簿書新故欲相仍迷離自笑墜中鹿來去從他坐上蠅
袖刺三年磨滅盡無勞過問客何能

伯言先生生日招石州位西願船同集寓齋卽事有作

兼懷余小頗雅州

高會曾寮憶昔年當時同伴各山川更招詩老開文讌
預典春衣作酒錢客勝公榮宜與飲書如張旭不妨顛
坐中強半成新侶望斷雙魚錦水邊

題石州煙雨歸耕圖

張君漢廷鼂賈徒百不一試乃箸書十丈塵中扇戶居
丹黃一卷窮朝晡比鄰有客相友于白頭簪筆金門趨
所遭不同同齟齬時時共倒花間壺忽然不樂懷故廬
將約耦耕先以圖吳生妙手工形模須眉宛然如可呼
視子不類山澤癯誰使被蓑歸荷鋤子則樂矣吾奚虧
陽泉山水真奧區是中耕釣多潛夫亦有人如吾子乎
顧我材能非世須問胡不歸田園燕行拙手版與子俱
子爲老農吾老漁

石州用山谷韻枉贈次韻奉答

石州磊落人高論藐流輩時髦怖其言走避恐不逮兀

微尚齋詩集卷三

三

坐見九州溟渤衆流會獨立太虛表俯視大鵬背此才
不用世天意知有在亭林立本朝潛邸與之配鼎足未
有人吾子當自愛鯁生晚相識矜寵逾望外微言發深
省功視讀書倍人生等浮雲倏忽生變態惟當風雨夕
載酒時相對所就未可期爲幸良已大

醉中走筆示兩吳甥

世眼觀天如坐井誰噉一鱗知五鼎客言鼓瑟勝吹竽
俯仰齊門徒齒冷吾甥嗜古過其舅濯濯英姿出天挺
瑣聞懸解異羣兒下視程文如土梗昌黎自謂不學能
賜也賢乎宜自省慈親茹苦近廿載王母高堂雪垂領

人生祿養豈迂事。負郭況無田半頃。方今造士固多途。文字致身非不幸。便當俯首勤帖括。猶勝折腰事干請。狂夫醉麩不自知。詩罷長吟酒初醒。

楊生子淵招同石州願船爲中秋賞月之飲。卽席賦贈楊生。居家如寓公。結客不知囊。屢空微雨有情。洗明月。高臺滿意納清風。坐中磊磊多文雄。酒酣棋罷廳日紅。長安此會那易得。好作家書報乃翁。

月夜偶作

兒時貪睡苦夜讀書卷。乍拋眠已熟。偶乘嘉月步中庭。歸臥翻勞頻督促。當時萬事不挂心。惟見月明如有觸。

微尚齋詩集卷一

古

二十卅飢驅始爲客。對月自憐形影獨。每逢佳景輒思臥。時恐還鄉夢難續。長安初到劇豪宕。月夕清游愛尤酷。步偕吟侶造幽篁。達曙歸來歡不足。年來漸覺哀樂多。游興更遭殘秣束。暫息塵勞喜近書。背月垂帷就燈燭。一身嗜好閱時改。廿載流光如電速。今宵看月偶開門。往事森然滿心目。恍憶家山舊書舍。瓜架豆棚歛老屋。他年定復憶今宵。且倒芳樽醉醕醕。

巳酉

卽事

春塵不雨自成泥。嬾出非關惜馬蹏。一片斜陽上東壁。

試燈風軟紙鳶低

伯言先生決意南歸有感賦呈

昔歲辛丑時初秋朱君介我從翁游餘二三子亦同志
微言奧義窮探搜五年頗極文字樂志欲據此輕王侯
浮雲變滅那可道酒人一散如輕瀉未雲忼慨幸不死
王郎抑塞誰相收江南勞客魚鱗尾塞北逐臣烏白頭
如數子者豈得已當時頗惜余雅州輕將麾蓋易觴詠
一官萬里天西陲年來自視頗失笑簿書堆案如山邱
得閒對酒不敢醉始知人事難自由先生曹署甚清暇
乃亦不樂思歸休小園花木手自葺扶疏紅蓼文牕幽

微尚齋詩集卷一

五

前年種竹爲久計作記曾笑黃岡樓敬亭山水自可念
胡不暫爲學子畱翁言我往計已決子方少壯宜遠謀
賤子聞言竊媿汗引鏡自照白髮稠讀律何關致君事
無田不退坡公羞耦耕亦要有沮溺政使去住無良籌
文酒流連樂已細是不余昇餘何求它年倘訪通德里
願執吟鞭隨杖鳩

戲和雲笏無題四首

芙蓉紅減首蓬飛清鏡晨妝是也非夢裏事都如水逝
天涯人不共春歸三秋月冷吹簫屨五夜霜寒織錦機
庭院深深門盡掩楊花何意入羅幃

牽蘿偶向苕溪頭。人道容華第一流。兩點遙山工鎖恨。
四時良夜。只如秋。因循絕望羊車路。寂寞甘心燕子樓。
其說連波真悔過。世間萬事等藏鉤。

造物多情亦費才。百般紅紫鬪春來。脂生北地難爲色。
梅近南枝易蚤開。翦伐縱無修月斧。護持安有避風臺。
謾將榮落歸時數。終賴東君著意栽。
捧心聊復效東施。未慣旗亭唱柳枝。自是陳王工賦物。
何曾洛浦解通詞。瓊環偶逐春風動。懷抱唯應夜月知。
荳蔻穠頭頻看取。紅芳何似未開時。

常冠卿招飲賞荷卽席賦贈

微尚齋詩集卷二

六

勝侶招邀水竹居。新晴荷氣襲襟裾。煙痕溼壓花欄重。
湖影明涵草閣虛。醉後歡言忘主客。坐來幽意屬樵漁。
平生風義關情甚。苦憶髫年問字初。
冠卿幼從先伯父受書

題石州小栖雲亭第二圖

城西隘巷如杪墟。中有數椽隱者居。深友隔牆每過酒。
侍兒識字能檢書。先生初意不如此。觀所著書可知矣。
誰令許身離稷人。木柄長鑱託生死。昔圖笠屐思歸休。
一身以外惟鋤耰。今年作圖益豪舉。買山竟欲營菟裘。
丈夫出處誰能料。達人自適旁人笑。平生絕域等尸庭。
君著蒙古游收記極精博。此日荒廬足歌嘯。君今去住如虛舟。我言

此亦非人謀君看妙畫通靈去意外還歸顧虎頭

送子治南歸

平生好酒悲意悔每自抑不圖窮冬晨更睹離筵色舉觴不能飲萬感塞胸臆與子非天親生又異邦域過情無乃甚自問轉滋惑鴻鵠將高翔誰能濡其翼去去勿復言相思還我卽

哭石州

方飲覆壺觴家人怨童僕我心苦煩紆快得縱聲哭深友莫如君死亦惟君酷記從己亥秋五妄罹岸獄泊乎丙丁歲連連喪天屬數君期功慘經歲踰五六自非鐵

微尚齋詩集卷

七

石腸無怪生命促君病未浹旬不謂遂沈篤視君卧榻間氣竭語難續謂余君可去吾疾愈且速自知色慘悽掩涕趨別屋歸來坐悲嘆啜劇荼毒長物羅案間皆君手曾觸注目盡涕淚顧影成孤獨我甥君弟子兩載蒙教育一慟豈足酬百身難可贖平生抱絕學辛苦志游牧孺子倘生男遺書冀能讀嗟余永索居魂夢庶來最此悲何時忘百年如轉燭

賓朋

賓朋來去各匆匆同抱咨嗟意不同我自傷心王濟死更無餘語對諸公

石工陳生以歷山歸耕圖屬題陳故石州客也

平生書劍兩蹉跎。恍慨惟餘對酒歌。少日狂癡真自悔。中年哀樂不勝多。故人黃壤今如此。借隱青山事若何。君說歸耕宜早計。鏡中吾鬢亦將皤。

書憤效昌黎孟東野失子詩

死不若速朽。此言誠聖人。帝命召李賀。豈謂無鬼神。云何溷中疋。不自庇遺文。人生天地間。臭味各爲羣。異姓或骨肉。骨肉仇讎然。胡不使同志。生爲親與姻。夜夢持此意。排雲叫天閭。道逢元巾夫。譬喻使我還。是皆人所爲。胡乃問之天。天遠九萬里。安知此紛紛。

微尚齋詩集卷上

六

子冶書來詢石州起居詩以答之

張侯成異物。風雪已歸棺。書到猶相問。心摧不忍看。天公方憤憤。人事日漫漫。孤棹今何處。江湖薄歲寒。

庚戌

易州道中

北風爲我掃黃埃。淡碧濃青潑眼來。野色平沈千頃合。斜陽倒擁萬峯迴。清時屢下求賢詔。物論應歸命世才。易水蕭蕭空往事。獨驅羸馬過金臺。

陶家屯

茸茸淺草帶平沙。輪鐵無聲鳥語譁。十里綠陰三面繞。

不知林外有人家

六皆 廷試失意歸賦此送別

何時風雨對牀眠。誦此令人意黯然。憶其門牆如昨日，相看鬢鬢各中年。科名何與文章事，學問今知博奕賢。歸詠南陔堪卒歲，漫將榮悴卜筵筵。

秋日雜詩

驚飈豁繁陰，虛室延新爽。溼葉委庭砌，風吹乾復響。殘月屋角明，了辨蟲網推。枕起徘徊萬感入，孤想悲隨。秋氣來歡逐，盛年往矚昔。尊酒人笑言成愉，况吾事恐蹉跎。華髮日已長。

微儂壽集卷一

九

我有最深友，忽夜夢見之。歡然握手笑，不異平生時。記曾相弔哭，今子復爲誰。自言病獲差，瀕死遇國醫。爲我述方藥，錄兩無所遺。嗟哉此幻想，何異兒童癡。晨興了無睹，涕淚霑牀帷。初日照積水，風來穀紋生。迴光射虛壁，濕漾難爲名。靜中閱萬物，一一移我情。曷然感身世，萬族各有營。恬競或異操，未易相重輕。卧龍出南陽，豈不賢躬耕。行當撫長劔，誓欲棄短檠。出門何所之，嗒焉返柴荆。

我游湯谷東，海水浴朝陽。浮雲從之升，宛轉蔽其光。當曙忽晦昧，萬怪紛披猖。流輝偶下照，猶使夔魑藏。安得

倚天劔吾欲斫，樽桑豁然披元陰。坐使金烏翔，巫咸求
不獲。虎豹守九閭，卻顧失歸途。仁立心憂傷，舉世畏處
明。吾謀誠不臧。

過石州故居

謝公神眸子，雲居問字頻。馳薄笨車寂，寂泉臺經歲別。
茫茫人海賞音無，遺書幸未投秦火。君歿後有揚言至
欲焚其遺文者友誰能問趙孤，門巷依然腸斷絕。斜陽鄰樹滿嘯烏。

有感

難覩黃精強學仙，也無圖畫到凌煙。出門結客多餘子，
痛飲狂歌悔少年。深友黃泉埋白骨，平明青鏡照華顛。
年來萬事銷除盡，賸有東坡挂壁錢。

微尚齋詩集卷

三

十月二十八日志喜

聖主持公議，巖疆託蓋臣。才頒三殿詔，已覺萬方春。命
將知神武，蠲租仰至仁。微生逢景運，喜劇欲沾巾。
倏忽刀輪下，修羅技亦窮。雷霆原獨斷，臺諫莫言功。元
象中台坼，妖氛薄海空。從知元祐治，不待相溫公。
痛定思前事，安危勢未分。大星沈上相，橫海出將軍。孤
憤口猶諫，遺章世未聞。舟山殘壘在，戰鬼哭愁雲。
諱戰爭延敵，沿邊盡撤防。汪黃參密計，宗李入彈章。天
意非屢宋宸謨，邁古唐猶寬崇羽。罰至德感吾皇。

林督師墓

恩禮應無恨。民生劇可哀。奪公何太遽。辦賊正須才。錮
疾緣幽憤。高名集衆猜。故鄉方款敵。魂去莫歸來。

徵尚齋詩集卷一

三

林督師墓
恩禮應無恨。民生劇可哀。奪公何太遽。辦賊正須才。錮
疾緣幽憤。高名集衆猜。故鄉方款敵。魂去莫歸來。

微尚齋詩集初編卷二

代州 馮志沂 述仲

辛亥

題鄭藹人同年西窗話雨圖

身世都如鳥倦飛，舊游重數一歎歎。太原公子亦安在，
講海燕市酒人今更稀。萬里風塵雙鬢改，十年郎省寸
心違。難忘此夕西窗話，猶得塵中暫拂衣。

題苗翁仙籬寒鐙訂均圖

古人已與不傳死，異代鑽研憑故紙。微言既絕俗喜新，
曲學紛紛安所底。西域老胡杭海來，衛道無人世風靡。

微尚齋詩集卷二

一

司天步算用西法，一藝取長猶可爾。悉曇卅六何語言，
傳會喉牙配宮徵。六經三傳百家書，讀以梵音曾不恥。
倉聖制字代結繩，聲寓偏傍固其理。聲形違反求音切，
縱有聰明亦安恃。本朝經術軼前代，菰中一老椎輪。
始後來推闡，代有人孤學終難喻。庸鄙君探絕業百載，
後欲以元音聰里耳。近師浚長得形聲，遠揖皋夔賡喜。
起驚愚豈免眾口，啓知我終當百世俟。狂言莫遣外人
聞，君且著書吾醉矣。

寄懷家兄

涼夜攤書共燭光，兒時情味最難忘。楸梧已悵廿年隔，

松菊俄聞三徑荒，零落親交同逝水。蕭條鬢髮有新霜，少游自憶平生語。私願區區或易償。

題孔繡山丈韓齋雅集圖次韻

我如五石瓠，世用百不適。君才似龍劍，未遇延津客。工詩乃餘事，頗已壓元白。四海一子由，聲名粲雙壁。片楮偶流傳，詞林共珍惜。人生貴用世，要及鬢未雪。一昨招我飲，中酒神不憚。西陲猶宿師，置吏負恩澤。感君澄清心，欲贈繞朝策。官卑言難售，咫尺九閭隔。康濟會有人，醪醕且今夕。

題雲泉夢影圖

微尚齋詩集卷二

二

滇南陳臥廬工詩嗜飲尤善畫梅歿後數年所善雲泉寺僧於月夜梅樹下見之亟前問訊不答朗吟一

詩而去其友爲繪是圖

古寺無人煙，月暝萬樹梅花淡。無影啾啾翠羽忽驚飛，花底詩魂呼欲醒。山僧相見若平生，不知已住芙蓉城。朗吟五字擲手去，四山謾謾松風鳴。負劍相從誰氏子，朗朗雙瞳翦秋水。人間萬古有梅花，此老精神終不死。仙居聞道隔三山，安得相從一叩關。昨夜分明吾夢到，梅花依舊似人間。

王戶部少鶴至

游子別河梁。設喻誓生死。昔與君別時。深語未及此。契
闊五年中。傳聞劇詼詭。江陵夢李生。道山愴蘇子。頻年
喪深友。腹痛今未已。頗自疑不祥。信爾亦其理。宵來聞
剝啄。欬然見名紙。握手轉無言。方寸雜悲喜。未損談辯
豪。更益鬚髮美。促膝語分宵。猶疑夢魂裏。

壬子

贈李春醴

少時狂惑不自程。跳盪欲以詩爲名。但擬千篇傲狂客。
不知四壁如長卿。二三勝流辱相許。謂我意氣能縱橫。
酒壚一別應劉渢。臣之質死形則生。偶拈筆墨祇增感。

微尚齋詩集卷三

三

豈有絲竹堪陶情。君索我詩意良厚。感激欲賦心忤忤。
側聞王師猶轉戰。粵西千里無堅城。巖疆豈比楚弓矢。
潢池敢效越甲鳴。男兒生世要慷慨。談笑便請終軍纓。
文章正可覆瓿。況屑好此秋蟲聲。君才磊磊不世出。
行當召對開延英。倘能爲國清嶺表。下馬草檄吾請行。
題何子貞同年村谷論心圖卽送之四川學使任

痛飲狂歌不計年。可無豪興對離筵。子貞是日不飲兩川道路

疑天上。三友風流在眼前。圖繪石州仙麓子貞三人象古蹟好尋諸

葛壘新詩應續浣花篇。張侯墓草今三宿。把卷臨風一

黯然

車中作

晴郊一舒眺殘夢落車中草露明初日林煙淡曉風乾
坤原浩浩鞍馬自匆匆抱牘歸來晚疏蟬聽未終

以事出朝陽門口占

檀弓物始漫陳俯仰千秋變日新自笑此行非職事
不勞騶卒嚇途人

兩行歎戲束子冶

覆舟之下無伯夷僂車之上無仲尼聖賢禍福偶然耳
豈有鬼物能扶持長安無風土三尺檣以百穢濕以繼
偶逢微雨畏遠出何況旬日長淋漓昨夜追歡聚深友

微尚齋詩集卷三

四

紅燈綠酒羣酣嬉豈知樂極成悔吝片紙促召晨車馳
車行十步九顛簸有似糠覈揚以箕長衢積淖深沒軛
覆輦在前尤可危婁頓顛越幸無恙圍人絕叫吾方嘻
廿年宦海飽更歷意行一往忘嶮巇我生萬事無不爾
矣謏神助甯非癡兩行孰與飲酒樂邑中御叔真吾師
君能衝泥秣車馬相就一醉哉此詩

和淑卿甥女對菊韻

宵來霜重壓茆簷對菊還愁酒價添秋入貧居成黯淡
花如詩格劇清嚴寒香吹徹風三逕瘦影移來月一簾
久失南邨欣賞客何心拈韻鬪洪纖

未知寒氣逼重簷。但覺宵來酒興添。花事漸如人意懶。
秋光已似客裝嚴。怯循短髮聊簪帽。爲惜餘香不上簾。
熟讀離騷餐落蕊。世間餘事本毫纖。

窈窕疏籬亞短簷。起看叢菊落英添。已憐九日須賒酒。
更憶三湘未解嚴。進之長纓堪繫虜。退無卜肆可垂簾。
秋來自覺情懷惡。愁對虛窗月影纖。

再疊前韻戲贈子治

君家老樹覆低簷。卻掃懸知樂事添。樊素歌喉能宛轉。
孟光眉案極莊嚴。酒筒詩版馳三里。鐙影釵聲共一簾。
聞道楚氛殊不惡。加餐莫使帶圍纖。

微尚齋詩集卷二

五

秋望

雲擁黃塵黯不開。深秋憑醉一登臺。霜花垂盡蜨猶戀。
風葉漸稀蟬獨哀。北闕婁聞嚴詔下。南征應有捷書來。
長沙羣盜披猖久。極目寒空憶將才。

書憤

中華全盛似當時。歲歲空煩羽檄馳。羣盜何嘗能跋扈。
諸公甯不共安危。九衢日麗冠裳耀。三楚烽高鼓角悲。
俯仰古今人事異。新亭垂泣更伊誰。

卽事

重城黯將夕。郭外日初斜。歸路隨疲馬。寒林帶晚鴉。愁

看天地隘靜閱歲時賒竊祿知無補端憂鬢欲華
病中贈六皆

俯仰悲身世無聊且復吟愁添寒夜漏病見故人心肝
膽各誰向蹉跎空至今更堪聞近事相顧益沾襟
歲暮書感

森森白髮鏡頻看寂寂青鐙歲又闌豪氣未除思請劍
初心多負悔彈冠羸軀並遣杯中物世事真成壁上觀
爲謝征南諸將帥久勞旃節駐江干

癸丑

次伯敷韻送別

微尚齋詩集卷三

六

隔巷經過少無端噩夢驚索居曾幾日風義見平生憂
患孤懷集文章薄俗輕前期應未易分手若爲情

功烈三千牘承平二百年萬方俄擾擾九陛獨乾乾財
賦煩供億韜鈴夙講研如何數千里不見一城堅

念子不得意年來哀樂多艱難計吏慷慨向關河報

國遲投筆思鄉盼止戈蓬門堪息影柰此盛年何

且遂還山樂無爲賦別傷窮通原有命聚散亦何常琴

酒陶書味風塵闕劍光臨岐聞鵲喜無乃洗兵祥

題鄂子位詩集

伯蒼
之子

詩人眞有後喜極轉神傷未覺古風遠誰云吾友亡傳

家本忠孝報國豈文章努力期繩武關河正斧斨用傅蒼句

送淑卿甥女之湖南

女子既有行義比士受爵動止難自操夷險隨所託自
汝歸漢陽十年事如昨暫來復當去歸程指樊洛頗憂
攘竊紛轉恃資裝薄牽衣母與弟有淚不忍落回思半
歲中憂虞間醫藥差愈參商苦未極葭莩樂我宦已甘
年微名自拘縛吳楚患陸梁朝廷思衛霍豈無謀國心
適乏濟時略何如諸生日糲食幸無怍千里從所天汝
行殊不惡送汝不暇悲吾事方落莫

送別子治

微尚齋詩集卷三

七

長江絕行櫂君去欲何之烽火三湘接星霜十口隨世
途迷取舍吾道在艱危留取筋骸健頻書慰夢思

送六皆歸里

君戀春明非得已夜夜歸心渡沅水款門忽到故鄉人
垂白高堂書一紙薄俗誰憐文字奇衰親忍遣門閭倚

況聞蟻賊踰太行鶴唳風聲駭桑梓自從櫂槍起西粵
武昌以下無堅壘烽煙未至城先空富者流移貧者死

吾州去賊千里遙巨室高門競遷徙州官辛苦擁黃紬

未必有開相料理君歸豈辦手搏賊挈家入山差可耳
送君未敢作苦語但祝歸途平似砥首途預計十日程

君家茅簷鵲先喜願君善保千金軀減省閒緣親藥餌
我純一官似雞肋太倉雀鼠真堪恥抽簪他日倘相從
共把漁竿弄清泚

上許漢生大司寇

薦牘傳聞坐客驚竟煩推轂到書生
王師未扼韓侯嶺開府遙屯潞子城
地偏京圻千里近事關桑梓一身輕
太行回首瞻親舍落日浮雲識此情

雲司已愧受恩深前席軍謀力豈任
報國敢揮知已淚憐才真見大臣心
累朝運祚方隆盛三晉河山自古今
憑仗天威與公意匣中長劍作龍吟

微尚齋詩集卷三

八

發保定

寇警已東來征人復西去
王程亦有期安得久延仁
回首望京華風塵暗雲樹
門閭白髮人魂夢青山路
躑躅忽神王慷慨叱吾馭
此意誰與論封侯非所慕

正定道中

寥廓乾坤任所之西風搖蕩客心悲
地多坡隴知山近天有星河覺夜遲
墟里蕭條兵過後庭闈笑語夢來時
男兒生有幽并氣可學楊朱泣路岐
鄰邱有人哭甚悲亦從征官也

寄懷兩甥

平生無意事功名竟卷殘書縛袴行
病後才華如退筆

別來情緒似懸旌。魂銷驛路輪蹄跡。夢斷城樓鼓角聲。
自古百聞輸一見。不須感慨易論兵。

獲鹿道中

秋風吹匹馬。西指井陘關。平野拓明月。孤村依遠山。
我行殊未已。鳥倦亦知還。苦望兵戈息。浮名付等閒。

將至太原大風

風捲黃沙白日陰。迢迢官路入寒林。人煙寥落餘兵氣。
野色蒼茫起壯心。一劍從軍羞自喜。廿年殘夢了難尋。
摩挲短碣梁公里。惟有枯槐閱古今。

次仲修韻兼示敬之

微尚齋詩集卷五

九

關塞蕭條行旅斷。賊氛倏忽如飛電。輿尸諸將各就戮。
擐甲元戎親督戰。西曹漫郎屬相遇。長揖軍門稱願見。
疏眉秀目口懸河。馬首賜刀腰羽箭。自言善以少擊衆。
臨機決死無岐念。邇來法境士玩寇。交綏而退如相餞。
遺民間里半扶傷。上相圍林鎮歡宴。九重赫怒付旌。
鉞。士氣軍心期一變。費禕辨賊信有餘。閻沒臨筵漫增。
歎。政當果毅肅綱紀。詎可優容效衰使。蜀卒雖精頗疏。
掠。赤足裹頭誇勇健。連村雞犬不聞聲。但見驚沙撲人。
面。哀哉斯民亦何罪。慎勿妄傳聞者倦。此行無意覓封。
侯。惟願紀游詩滿卷。

贈張小袁表弟

文章有神交有道杜陵眞實不我欺昔年瑣院共簪筆
年俱舞勺肩相隨風萍一散三十載頰上各有滄浪髭
途中馬上若相遇彼此豈復知爲誰誰知天公巧作合
客窗縱飲歡淋漓吾曹生世百無用囊底賴有驚人詩
君才卓犖十倍我目前莫歎數偶奇如賤子者豈不遇
俯仰家國知何禩他年名宦恐不免坡老此言良可思
固關軍中懷并門故人

我本并州人卻作并州客并州信美非吾宅安得凌風
生羽翮有兄遠在河之麋別時方壯今白髭有姊京華

微尚齋詩集卷二

十一

依老母歲暮飢寒俱健否丈夫許國違知它雄關千里
行荷戈虛名誤我遂至此蒼生亦如安石何故人官閣
坐清夕寒梅落酒生微波對酒懷人歌短歌人生憂樂
何其多

小吾兄寄詩詢近況次韻

豈有封侯骨從軍愧此行邊防資餒卒巧宦厭書生風
雪高堂夢瘡痍故國情壯懷銷欲盡對酒不能傾

甲寅

元夕宿柏井驛

馬上逢元夕停鞭月未斜兒童喧社鼓燈火聚山家爲

容驚時節酬恩感鬢華去來緣底事吾道足長嗟

平定董湘叢刺史招飲湧雲樓賦贈

萬峯頂上一樽開佳氣葱葱入望來
村郭雲山環几榻滿城鎧火近樓臺
得時聊試烹鮮手多事還資保障才
前輩鉅公題詠在醉攜紅燭拂蒼苔

明鏡

明鏡晨看轉自疑無端元鬢忽成絲
此身渺渺將安託來日茫茫詎可知
感激畏聞天下事清狂漸悔少年詩
中山醇酒應難得欲覩仙山看奕棋

游晉祠

微尚齋詩集卷

蚤讀太白詩心慕晉祠水京華二十年
合眼見清駛去年客并門聽鼓隨節使
其時方戒嚴雷礮驚百里事權雖不屬
游觀倘非理倉黃一檄下屬囊執鞭彈
抱關長干夫計日逾三紀庸才竊非據
有似聲帶襖閒關復歸來羣笑心獨喜
平生山水緣或者天所啟黃塵汚吾襟
煩垢快一洗命疇秣車馬暮宿西山趾
凌晨入招提孤塔聳雲裏言訪難老泉
琤琮亂宮徵上揭松僑書虹月互天起
列榜森時髦靈境蒙垢恥石欄夾修渠
隨在堪徙倚異哉池中萍冰雪青不死
丹黃粲沙石鱗鬣數鯉一椽如可借
吾老是鄉矣請看出山泉清冷尚如此

并門旅感

平生湖海氣難除。豈合侯門效曳裾。好事易招流俗怪。
閑關聊與古人居。因留東閣觀奇士。漸覺南華是僻書。
三徑已荒歸未得。草堂猿鶴意何如。

蘭洲招游屈園山賦贈

履盡巉巖更上樓。川原歷歷見并州。荒村復有誰高隱。
山爲公佗塵世無如子好游。布襪青鞋穿鳥道。花叢
先生故里棘護龍。微風忽送神靈雨。如此溪山不可留。
蘭洲屢屢前韻相酬勉復和之

山樓迢遞俯城樓。天闕靈區壯此州。吾輩詩情良不淺。

微尚齋詩集卷二

七

幾人宦海得閒游。林巒四合雲埋寺。心跡雙清月印秋。

卻羨拗花歸去客。襟裾時有妙香留。蘭洲折牡丹甚多

百里青山繞郡樓。居然風景似吾州。蓬萊咫尺迷歸路。

松菊荒涼悔壯游。疲馬有情悲遠道。癡龍無意出深湫。

浮生自笑成漂泊。又作僑房半日留。

君臥元龍百尺樓。一官蕭散似監州。詩名寂寞高常侍。

壯志消磨馬少游。稍喜幅巾尋野寺。更欣沿水見雲湫。

行蹤已悔山僧識。那用區區姓字留。

秋夜不寐

夜漏無冬夏。愁來總覺長。風聲欺破牖。雨氣逼空牀。留

滯身何補浮沈意自傷近郊猶賊壘吾亦愧軒裳

送別家兄

一別將廿年再聚未兩月茲晨復何晨僕夫告當發與君昔少壯相視成白髮執手郭門外斜陽暖高關田家有昆季相倚若叩歷念此悔浮名躊躇肺肝熱家居亦難久慎勿憚行役待君風雨宵聯牀話饑渴

雨夜不寐有懷家兄

今夜荒村雨迢迢其此聲相違無百里不寐各三更稚子眠應熟羈人夢易驚還憐未歸客欹枕待窗明

九日登高

來時關樹葉初黃久客并州似故鄉塞上旌旗成一夢樽前風日又重陽班超萬里空投筆毛遂三年未處囊無限憑高悲壯意滿城煙靄暮蒼涼

畱別墨林

嵇呂風流說到今與君相憶亦相尋邇來耽酒復誰共別後入山如許深東閣故人畱客意北堂慈母望歸心人生去住渾難必且聽飛泉漱碧岑

將去太原張小袁恬如李汝為三表弟送之五十里外

青龍鎮旅店共飲竟夕賦此為別

送我欲何適嗟君情已深驅車出山谷彌望一蕭森疲

馬仍長路寒鴉各舊林今宵村店酒別後最關心
忻州

半痕斜日秀容城一水彎環照眼明正是人家炊未熟
風箱齊作故鄉聲

一載

一載從軍細柳營歸來猶是舊書生征人何與青山事
萬阻千遮不放行

乙卯無所作

丙辰

游白人巖

微尚齋詩集卷三

十四

勝地聞名舊今來廿載餘言尋青嶂路同叩白雲居不
負平生約如逢未見書相看成一笑吾道在樵漁
僧臘八旬上安禪甲子周須眉疑太古麋鹿與同游老
樹昔親種清陰今已稠不知白雲外人世幾春秋
洞口雲生處縈紆似篆煙須臾成白地咫尺失青
露滴爲雨松風吹作泉試登高閣望晴日滿前川
一榻雨聲上四山雲氣中峯巒俄隱見臺榭入空濛澗
樹籠逾碧崖花洗更紅歸途不可見吾欲馭長風
殘滴檐閒歇微風木末來溼雲團作絮削壁淨無埃已
見峯頭日猶聞澗底雷客懷與險曠向晚一時開

雨霽天如拭雲奔月倒行
燈前千嶂暗林際一川明
古佛寂無語幽禽時復鳴
山居狎雲物漸欲識陰晴

翠壁劃天色白雲棲寺門
干霄花作態穿石樹盤根
苔滑難容步蘿高不可押
延緣懶歸去萬壑已黃昏

巖棲才信宿忽忽易歸期
此後應相憶重游未可知
欲尋鋤藥伴更蓄買山貲
獨恨無飛瀑何由洗惡詩

寺題
甚雜

秋夜

寂寞初秋夜冥頑後死身
還家餘涕淚去國尚風塵
夢裏斑衣在愁邊白髮新
中宵頻坐起顧影一沾巾

大營道中作

朝看林葉盡暮見煙樹綠
云何百里閒氣候異寒燠
堅冰會當至稍後已蒙福
物理莫不然豈獨草與木
南中比喪亂萬姓為魚肉
茲土幸安全禍機仍倚伏
司農所仰給惟晉及秦蜀
有夫抗疏言加賦用乃足
觥觥中丞公為民騰奏牘
洵哉麟鳳人不愧牛羊牧
顧茲磽瘠區民無隔年蓄
輸將動百萬徒飽潰兵腹
月益十萬金部符如火速
哀哀萬家命巍巍八州督
作偏始何人功過差相贖
後賢所經畫仍在金與素
誅求苟未已流亡恐相續
十室倘九空何所施鞭朴
仁人或念此宜稍輕爵

微尚齋詩集卷三

祿畱此集澤鴻無爲走險鹿吾言所非忠天地實昭燭
舉世無賈生誰能知痛哭

丁巳

石嶺關道中

列岫隱殘霧朝曦明遠沙林煙依水重村舍逐山斜促
鴛喧晨鵲停鞭集暮鴉無勞怨關塞故里卽天涯

并門晤黃子壽編修聞伯言先生耗

杖履追陪記昔曾談詩說劍興飛騰還山寂寞同王式
避地蒼黃似杜陵造物生才甯有意空文垂世政難憑
長安舊邸渾無恙悔煞扁舟誤季鷹

微尚齋詩集卷二

七

春日與梅岑參戎雨田別駕礪生鳳皋兩廣文爲投壺
之會礪生以詩索和

生不解效牧豬奴棋局幾道尤惜如羣居無以爲歡娛
解嘲惟有酒百觚王君藝事兼十夫鄴侯之架張顛書
有時瞑坐據檣梧七絃在手靜若無一昨示我玉女壺
爛爛古色閒碧朱壺修二尺矢七扶百二十發如貫珠
四坐驚起笑且呼將軍能武兼好儒判官麤官殊不麤
天官家言精爬梳河東廣文狂者徒酒酣往往談陰符
新詩示我要我俱我如南郭已喪吾汗流僵走難並驅
從來勝事不可孤欲默難默中煩紆今者之樂未覺殊

後○此○豈○復○能○相○踰○浮○雲○聚○散○天○一○隅○他○日○念○此○應○嗟○吁○
諸○君○努○力○鞏○皇○圖○我○拋○手○版○歸○舊○廬○更○有○奇○詩○相○唱○
喟○

入都留別里門親舊

十○日○平○原○飲○未○休○馬○蹏○催○客○去○難○留○出○山○小○草○元○無○謂○
逐○水○飄○萍○不○自○由○豈○有○文○章○堪○報○國○更○無○骨○相○可○封○侯○
羸○車○他○日○長○安○道○應○爲○塵○勞○念○昔○游○
枕○由○餘○生○又○轉○蓬○鳥○飛○知○倦○柰○巢○空○故○鄉○歲○月○都○如○客○
宦○海○帆○檣○亦○任○風○二○頃○誰○能○謀○季○子○五○噫○我○已○愧○梁○鴻○
鳳○凰○山○色○常○谿○水○尚○欲○歸○營○一○畝○宮○

微尚齋詩集卷二

七

都門喜晤王霞舉孝廉賦贈

走○昔○三○十○餘○論○交○得○張○子○清○秋○顧○祠○奠○使○我○觀○奇○士○商○
侯○時○甫○冠○眉○宇○照○秋○水○並○世○少○可○人○譽○君○獨○不○已○得○君○
山○左○書○銜○袖○走○同○視○張○君○俄○異○物○商○亦○遠○從○仕○中○間○偶○
見○君○離○合○一○彈○指○屬○更○懼○憂○患○濩○落○今○至○此○我○出○君○復○
來○相○見○劇○悲○喜○辱○詢○近○所○作○強○應○顏○有○泚○貧○居○課○齋○鹽○
傲○簾○束○經○史○天○籟○偶○一○鳴○雕○蟲○良○自○恥○君○才○乃○十○倍○如○
海○不○可○淡○昔○爲○張○君○來○負○笈○走○千○里○此○事○古○尋○常○今○人○
復○能○幾○謂○我○蘇○門○客○推○愛○屋○烏○比○感○逝○行○自○傷○斯○文○慚○
後○死○願○言○砭○其○頑○交○道○有○終○始○

書感

司農久乏水衡錢。三輔飛蝗影蔽天。惟有酒樓歌館地。風光渾不異當年。

贈逸蘭

早歲長安誓車笠。與子齊年俱二十。江亭客散坐深語。露下秋空月華溼。兵戈阻絕酒壚渺。喜對清樽手重執。相看鬢髮成驚呼。百感蒼茫醉中集。君言別後行路難。東筍詩多空戢戢。在昔風騷盛挽推。祇今遺棄誰收拾。佳篇縱落後人口。豈識當時歌代泣。我愧年年事鉛槧。自謂過君今不及。一室難爲容膝謀。千秋況冀虛名立。候蟲時鳥爭啾啾。我輩安能忘結習。但當緘秘勿示人。此事定非渠所急。

微尚齋詩集卷二

六

讀柏硯山房集次少鶴韻

問字亭空鎖綠槐。一篇重對百憂來。時艱未遂山中老。天意猶存劫後灰。冀北孫陽甯再遇。江南庾信不勝哀。中秋已到重陽近。淒斷何心獨舉杯。

再和少鶴作

更無塵夢到檀槐。歷歷前游眼底來。遇事激昂添鬢雪。隨人俯仰覺心灰。早年意氣空千古。近日詩歌慕八哀。聞道長安盛文讌。嬾隨肥馬覩殘杯。

題少鶴龍壁山房集

十萬貔貅尙枕戈，王郎斫地欲如何。壯心未肯愁中盡，
長策從來局外多。夢去軍聲喧鼓角，詩成歸興滿滄波。
誰憐磨盾揮毫手，不遣甘泉奏凱歌。

從軍行答敖金甫主事

君歌何忼慨，忼慨傷我神。語君且勿歌，聽我歌從軍。

皇帝三載秋，豫寇窺絳汾。遣將未及至，畿輔纏妖氛。
沈憂負令節，桂酒方罷醺。闖然勅目下，驚起手自捫。沈
沈司寇公，薦牘陳天閭。謂我瞭兵勢，輿地勤討論。請賜
平臺對乘傳，參戎軒顧慚。國士遇欲辭，難自陳。詔許

隨節使職與偏裨，倫急裝別阿母欲語聲。復吞老淚不
忍灑，念我王事敦再拜，執爰去日暮出國門。此地昔通
衢，車馬終夜喧。今來行旅絕，千里飛沙塵。時逢幽州騎，
三五各成羣。弓刀入閭社，皆裂避市民。堂堂思節制，簡
冊疑非眞。生平程不識，世豈有斯人。令尹適紆我，陽子
遂宣言。焉知千載後，不異古所云。歎息驅駑馬，飢腸轉
車輪。月黑叩村店，闔拒那敢曠。闔門迫自語，身非兵與
官。鼯勉納之入，一飯動數緡。陰風中夜起，殺氣凌乾坤。
雞犬忽上樹，驚呼破愁眠。我宿伏城驛，賊踞橐城村。阻
水不三舍，鳴礮聲相聞。徒御慘無色，或勸旋吾轅。子銜

空命來一卒不隨身牽率乃至此猝投空泯泯意行竟
得達手版入太原中丞禮數異相見惟寒温欲進繞朝
策似聞莫敖徇煙塵暗井陘飛檄扼重關楚謀猶在晉
齊城未下燕囚遇王子弱身焉介推文功名一失馬世
事萬積薪那無盈篋書聊共反側安碌碌未成事亦無
人可因蕭蕭易水遠慘慘風塵昏寶刀暗將折霜鬢淒
已繁我欲竟此曲掩抑摧朱絃姑酌與君酒從軍多苦
辛

題霞舉詩集用山谷韻

靖陽狂客去不返眼底何人能讀書王郎萬古在胸臆

微尚齋詩集卷二

三

不藉掌中紺色珠今人習氣已掃除未知古人較何如
曲澗方塘自澄澈輸君大句吞江湖

霞舉招同葉潤臣閣讀朱伯韓觀察許海秋中翰李子

衡楊汀鷺兩孝廉小集分韻得冬字

曹司罷直日下春城南近局聊從容長安裙屐盡豪彥

詞翰追逐如雲龍主賓落落異鄉縣臭味忽若金在鎔

子綦隱几久喪我此有似空谷登二難四美一朝集

舉觴自詫無歡悰省闈回旋二十載儒生未老非不逢

乃知哀樂亦天賦造物畀我塊磊胸揮戈幾見日返舍

吹律妄思天輟冬不能取印繫肘後安用啁啻如寒蛩

埋憂寄愁諒無術擬就酒帝求侯封王君示我有新句
心憂魏巖傷吾農吾儕竊祿政堪恥得失焉辨單與鍾
時中聖人亦不惡此與世味誰醜醜酒闌語罷月東上
嚴城寒鼓催薨薨

蔣霞舫府丞於少鶴所見余詩枉和兼過訪

疏慵久已畏公卿下直蕭然絕送迎豈意瓊瑤酬木李
翻勞車馬問柴荆交親已似晨星少文字誰操月旦評
欲續遺山吾未敢今人嗤點到蘭成

讀少鶴見和詩感作

昔年豺虎逼京畿慚愧匆匆短後衣幕府韜鈴工自運

微何齋詩集卷二

三

書生聞見苦相違駑駘十駕期千里大鳥三年靳一飛
烽火未銷知已盡吾曹持此欲安歸

東霞舉

平水王郎世絕倫詩仙書聖復經神遠心竟欲追三古
餘事猶能了十人早已銷除年少氣還期珍重歲寒身
惟憐簿領沈埋客蹈隙經過動一旬

寄淮三弟

嘉禾有遺訓聞之自先祖家無犯法男亦無再婚女吾
宗二百載官未踐台輔所以稱高門端不在華膺仰惟
高曾來清白慎取予少長何彬彬流風逮諸父嗟哉余

生晚俛仰成今古倚廬三年居卻掃謝官府敢云示楷
模或且笑迂腐吾弟孝友人神理不終寶勉哉益清修
飢來字堪煮

賈小樵員外謂余評霞舉書第一詩第二文第三霞舉
有詩見示顧余未見霞舉文實亦無是言也賦此自

釋

讀書惜句讀糟粕視鄭伏作詩無篇章奴隸叱坡谷薄
俗吾所憎肯蹈前轍覆君能十我不戰久心服有力
如虬蟬撼樹非所欲枕祕矧未窺何由效攻玉客有月
旦評鑿空非實錄翻以君子心厚誣小人腹生年直斗
箕意外騰謗讟或意鄰竊鈇動成書舉燭君房言語妙
莊謔皆自牧孺子滄浪歌婦人泰山哭虛懷聆萬籟何
往非忠告君詩意自善吾辨言非瀆從來文字難不必
在非族流言變丹青將非吾黨福方人聖未暇末學滋
殞殊然明戒防川子罕乃執朴二者吾未能自反良亦
縮和詩咎賈君俾以一鳴贖

與霞舉夜話作

遼東白豕本無奇人海浮沈閱歲時漫捲詩書親案牘
飽更憂患得狂癡謝宣明面勞相向孟浩然身久自知
賴有故人能過訪不成歡醉且論詩

讀孔繡山文對嶽樓續集賦呈

憶從梅叟初識君謂君清瘦如余陳言翁嘗東余云昨

如頗清琅邪槐里亦時彥相與問字窮宵晨此豈足煩

造物忌聚散忽若風中蘋吳門老監晚為客不遺一老

虧天仁朱君調選住京輦較昔詞署尤清貧仲宜從軍

亦如我書空眉蹙無時伸餘子相望不可見傷離感逝

摧心神喜君別後詩更富亦如其人清且醅惓懷游從

乃及我謬許年少如衰文五字用見懷向念昔求學荒務廣欲

通漢未除涯垠力孱才弱近自悔哦詩妄擬程先民劄

鏤肝腎出常語於古未合時已嘖燕市高歌亦聞作竹

微尚齋詩集卷三

三

林舊侶今何人語君且勿話曠昔昔日少年霜鬢新

霞舉雪夜招同人為消寒之飲時聞瓜洲大捷即題所

繪天街踏雪圖是日以姓分韻得馮字

雪花六出占歲豐九衢人語聲融融常時閉門卻掃跡

興來那不憂途窮胡為倒衣竟不顧敝車破帽裘蒙茸

城闕觚榭亦何有一白但覺天地空況復東南靜煙霧

捷書夜奏甘泉宮快意不飲將母憎今夕聊可貪天功

迴廊積素皓如月樺燭交射光瞳矐酒酣窗紙鳴朔風

忽憶仗劍西從戎當時決往不顧返擬圖麟閣隨諸公

不然馬革裹新息男兒死亦為鬼雄奈何局促文書叢

紙尾署字頭冬烘回舟乘興非訪戴下車攘臂真羞馬
自顧我顏非昔紅亦思老作簔笠翁封侯無命夢不到
耦耕有志誰當同念君風雪太孤寂何不添余驢背偃
蹇從雙童

何青士侍御齋中分詠晚菊得榮字

薊北梅未花籬菊無遺莖常恨共霜雪兩美鮮合并君
菊少須之庭梅亦將榮後時良有待何必傷晚成

海秋齋中分詠唐花得覺字

百卉窮冬斂芒角夢中誰喚天工覺窟室四周紅錦幄
不向東皇借優渥俄頃雲蒸復椒駁始作者奇見已數

微尚齋詩集卷二

十四

我欲排雲聽韶節皆莫惟識堯時朔唐宮羯鼓非雅樂

微尚齋詩集初編卷三

代州 馮志沂 述仲

戊午

人日繡山年丈招同高寄泉大令吳子貞孝廉及朝鮮

吳亦梅安桐齋飲分韻得盤字

筍香魚美簇春盤佳節愁心強自寬
載酒客添新伴侶談詩人有古衣冠
萍蓬聚散浮生易天地風塵此會難
不爲重闔限車輪竟須沈醉向更闌

卽事

曉枕寒多夢不成閒階負手百回行
雲含雪意兼雨意

微尚齋詩集卷三

風送春聲和市聲案牘暫拋宜縱酒
江湖極望未銷兵
憂來欲問君平卜嘯傲何緣得此生

寄朝鮮李藕船

海邦甚清晏況復早懸車歲月供耽酒
雲山對箸書更聞詩律細應念故人疏
顛賴春明客何年返舊廬

亦梅索題天竹齋圖

吳子海邦彥觀光來

帝州千金購亡書插架如艱候

嘉卉手親植云可袪鬱攸青柯綴朱實
掩映珊瑚鉤是物名慎火聞出炎海
甌何年落東土媚此曲室幽主人
愴相對把卷方科頭滄溟久不波
宦隱皆優遊鄙人屬

有念所念非身謀焉得樹護草陶然忘百憂

梅先生補發日霞舉邀同伯韓繡山青士少鶴為位以

祭賦呈霞舉

君恨不識宣城翁翁之顏狀吾能說瘦幹疏導如古松
翦水雙瞳更清絕余君朱君昔要我隘巷城西漫通謁
以蠡測海蓬撞鐘我縱不慚翁豈屑何期臭味無差池
初若難親久方悅曹司退食一相訪快若炎蒸對冰雪
翁之文章學諸子入百萬軍持寸鐵訂詩著墨亦無多
洞垣一方見癘結一語真堪百日思十年豈意千秋別
寄書索硯未報章聞道郎君已衰經感君風義似古人

微尚齋詩集卷三

瓣香肩為南豐熟平生真率意可仿肄禮無煩表綿蕞
當時坐客餘二三感舊難禁五情熱夢中魂魄倘相親
更欲從翁問詩訣

繡山年丈屬題其尊人俊峯先生母宜人二圖

瓢城餞別

不飲瓢城水飄然返故園琴書充宦橐父老具壺飧大
府能行意愚民自感恩時危須長吏往事那堪論

寒宵稱藥

昔聞孝婦能乳姑於傳有之今則無孔君示我稱藥圖
再拜展讀聲淚俱我昔從軍母倚閭歸來一月萱草枯

婦之事姑有如此嗚呼吾生亦人子

葉潤臣城南買醉圖

身後千載名生前一杯酒何如黃金印懸肘窮通有命
不早知局促塵埃行自首欲築糟邱作幸民側身天地
足沾巾東舉沈醉三閭醒誰是肝腸木石人

鵬南和余奇字韻依韻答之

童年骨相頗權奇豈料摧頽值此時粗涉文章甯免俗
不工趨走自緣癡三春百卉爭新節十載重泉感故知
更欲與君焚筆硯古來寒餓例耽詩
秩滿注官知府鵬南以詩見賀賦答

微尚齋讀集卷三

三

我慣疏慵已成性時方俶擾正須才為問銜書二千石
何如日飲三百杯塞翁失馬事翻覆鄭人得鹿心驚猜
一官中外底稱意羨殺柴桑歸去來

悼敬之

汝母來京師見汝始扶牀十載遂頽然嗜古能文章治
經守馬鄭作賦追班揚探丸起人死餘事亦殊常乾坤
忽瘡痍畿輔頻旱蝗為粥活饑民高義傾冠裳書生憂
國心上可質彼蒼謂宜有天道報汝壽且康一痾旬日
閒促召來巫陽云何此酷虐先事無禳祥哀哉孰使然
人生安可量慈母垂白髮少妻浣紅妝瘦弟哭失聲恨

不借汝亡稚子未知悲麻衣嘯索漿觸目不忍覩沈痛
燔中腸與汝雖舅甥恩情猶子行薄德百不堪貽汝以
咎殃汝母言汝夢旌旗擁舟航其中多羽人迎汝歸仙
鄉仙鄉定何許塞悲以荒唐

友人屬題子貞同年畫扇用山谷墨竹韻

媛叟學昌黎我非湜籍輩豈云驂雲龍僵走常不逮餘
事寫幽蘭神動天與會有如平原書筆力透紙背吾觀
月印川攬取無不在君書逼古人畫乃與書配腕有鬼
縱橫心泯世憎愛詩書源竟委道義中襍外潑墨聊戲
劇事半功已倍憶君淡蕩姿語默異時態幽幽一叢花

微尚齋詩集卷三

四

其人宛相對所恨別經年與君空老大

寄家兄

九衢塵中五畝宅萬里橋邊四年客高會以下吾兩人
地角天涯竝頭白四十五年爲弟兄未有廿年相合并
功名富貴亦安在喜君五十頻添丁我歸君出如相避
我又出山甚非評大兒讀書雖不多能諷羣經九千字
小者亦非豚犬兒悔不畱身自課之誓司衮袞富林彥
安所用此迂儒爲太息鄉鄰非舊俗競覩錢刀廢耕讀
荒蕪豈暇憂田園墳壟還聞被樵牧更憐北山十萬松
三日坐我圖畫中昔游相顧已非少他日重來成兩翁

念君不歸非得已我亦何爲徒索米
莫爲無田誓江水

題鄭子產殘碑

聖門以外數才彥東里大夫真我師
區區一鄭支大國談笑能以玉帛綬
井埋木刊誓雪恥陳侯擁社如嬰兒
庇民強國自有術折衝豈僅工文詞
君之聲名炳日月姓字不藉貞珉垂
斷石遺文略可辨絕勝六一書斑碑
想其慷慨對晉使晉之縣鄙何國爲
豈惟疆鄰氣銷鑠此語千載令人思
夷吾不復出江左太息遺風誰嗣之
題孔經之年丈韓齋聽雨圖卽送之秦中

微尚齋詩集卷三

五

君家兄弟傳家學各抱遺經與世違
萬里看雲勞遠夢幾年聽雨得相依
秦中自古詩人住燕市於今酒客稀
我亦鴿原隔煙樹爲君岐路一沾衣

送孫琴西侍讀出守安慶

皖江形勝縮全吳帝簡詞臣此剖符
青綬豈能榮我輩黃堂差喜得真儒
勞心撫字覘新政回首承明戀舊廬
君去淮陽應卽召未妨操版學庭趨

書憤

海氣昏昏鼓角悲邊人延頸望旌旗
空聞魏絳和嘉父無復陳湯斬郅支
驕虜久忘天廣大羣公誰繫國安危

漢廷司馬新持節好竭忠謀報 主知

八月二十八日漁洋生日孔繡山中翰林穎叔工部招

陪壽陽相公琴西青士少鶴集慈仁寺分韻得代字
古寺澹夕陽長松散秋籟懸弧緬昔賢挈榼成嘉會新
城老尚書詩名冠昭代峇峇二百年壽陽與之配名位
過前人所同俱勇退後生屬多幸撰杖承清誨脫身案
牘中耳目暫愉快有如湯年苗後枯資一漑高閣俯城
闈慙慙見鬢鬢撫今惜芳辰望古發遙慨湖維新城時
元氣充宇內施宋梅與宋騷壇盛槩敦公如生其間拔
戟成一隊賤子執鞭弭亦或比鄙鄙茫茫歲月徂忽忽

微尚齋詩集卷三

六

乾坤隘裴公居綠野意豈忘侘傺鐘鼓及園林娛游亦
無柰秋氣古所悲況當送行邁所願蘇民生終期敵王
愾策勳登明堂盛筵儻能再時琴西將之安慶任

九月十九日霞舉招同桂德山黃翔雲王東浦三兵部

及小樵汀鷺爲展重陽之飲分韻得盡字

今歲重陽嗟可閔竟日風寒雨淒緊衝泥散直車雞枓

發興登高還復忍開樽自笑酒須賒搜篋況無衣可準

豈意嘉招值今夕復對花叢觴滿引主賓犖犖多詩豪

各建旌麾嚴鞞勒德山意趣與時異萬里晴空翔一隼

黃君詩語勝我語退食焚香弄瑤軫楊郎嗜古不余棄

王子繩文常我窘自媿哦詩二十年古人未合時人哂
那逢楊意誦凌雲每被秦優憐陞楯撐腸但有城且書
朽株安望蒸芝菌邇來聞見異曠昔往往歡娛雜悲愍
相逢一醉得亡何世事萬端甘不敏更憐城南賈大夫
夜來怯篋衣衲盡似遭惡少欺玉川安得昌黎作京尹
何如買觴醉我曹調語漫邀君一戰

題子衡尊人我園先生風雪夜歸圖圖爲課孫作

兵戈阻絕江邊宅避地棲遲鬢垂白我園梅傍戰場開
遑問巾箱舊書冊豈意連天風雪中復有書聲慰歸客
我昔五齡侍祖旁口授毛詩誦琅琅書齋小杏手親植

微尚齋詩集卷三

七

別時作花紅過牆卅年萬事成滄桑青鐙之味不可忘
紹興石經殘本

紹興殘石珍片羽楮色斑斕墨花古幾餘宸翰寫遺經
儻不忘離真令主誰言六籍無神靈能以偏隅抗驕虜
中宮書翰尤絕倫曾寫蘭亭能逼真可憐帝后癖文墨
援桴獨有梁夫人

古民移居相鄰以詩柬之

昔年會結歲寒盟散雪搏沙事屢更余小頗朱伯韓皆嘗寓此巷偶

對棋枰虛夜月每思鐙火共書聲羊求豈意聯新侶沮
溺終期得耦耕君官頻來倘無酒寒宵猶可命茶鐙

悼龍翰臣方伯

昨見除書意已悲。謂君新廢蓼莪詩。誰知遠道懷人日。正是高堂哭子時。樽酒歡娛成昔夢。名山事業渺前期。年來親舊凋零甚。我亦繁霜滿鬢絲。

月夜柬古民

開關無剝啄。斗室似山深。燈牀得幽意。月明生遠心。醉醒千小劫。哀樂一長吟。獨恨東鄰客。清宵不見尋。

同人消寒弟一集以勇齋文集刻成志喜分韻得文字

同集者為海秋潤臣汀鷺子衡翔雲霞舉及仲修

張子昔擯棄息交辭世紛。顧我獨何厚。晨談常至曛中。

微尚齋詩集卷三

八

年志隱退作亭名樓雲惜哉不下壽。老木拱秋墳遺書

轉嶺海幸未罹兵氛。後死媿深交。力如負山蟲。釀金壽

梨棗風義欽。諸君高弟職。披離心苦力亦勤。眼明喜見

此天未喪斯文。披尋感今昔。逝者何沅沅。二難紹絕學

並足張吾軍。一个今又弱。痛念失所云。吾生能幾何。白

髮不可耘。高歌奠杯酒。庶幾泉下聞。時敬之七
半年矣

霞舉以弟一集後至復置酒飲同人謂之閨集即以閨

字為韻

人生不作醉鄉侯。便合移家酒泉郡。誰能刺促塵埃中。坐待繁霜上鬢鬢。王君結客慕豪舉。傭書得錢買良醞。

小齋主客靜不譁別院笙歌鬧成陣疏篁負壁意蕭索
有似黃楊遭厄閨世間靜躁各趣舍身外榮枯誰喜慍
我如棘軸投方穿傳以豨膏堅不運君是今時陳太邱
道高不欲門牆峻百杯引盡盃少休更覩新題搜險韻
次公雖醒亦能狂莫笑醉言忘審慎

消寒弟二集詠冰鐙限忽字

炬火寒斂威清漣凍生骨中含一寸丹外積千秋雪坎
離爻錯綜丁壬氣蓬勃射眸未憂寒炙手那慮熱頗疑
堯年水稽天倏凝結陽鳥墮其中終古遭汨沒又疑火
齊珠吐皎蛟龍窟疑然牛渚犀秘怪來恍惚疑登峨岷
顛朝陽映清潔琬流浸列星玉壺貯秋月抱燠摧圭稜
揚光泯凹凸點哉誰朔始意匠不可詰冰山尙難倚斯
戲恐倏忽飛蛾方自投難與夏蟲說

消寒弟三集霞舉將有兗州之行同人賦詩畱之得且

字

王郎倜儻權奇者一日詩聲滿都下鉅公側席聽談經
名輩題襟邀入社三千年事口能說五十紙書手親寫
煮字從來不療飢衝寒忽秣青齊馬賤子孤吟已半生
未覺曲高惟和寡十上何緣得自通五窮未可輕相捨
每思操版伺顏色不及從師甘楚檣因君得與數子游

不我愚蒙荷寬假。正宜杯酒接從容。安用冰霜行跣跣。
平生常笑杜陵客。茅屋不完思廣廈。曾聞爭利必於市。
豈有善謀翻適野。願歌行路擬鮑昭。漫祝歸裝如陸賈。
空言畱行諒無益。珍重臨歧袂重把。野店村醪不足嘗。
花底一杯君盍且。

消寒弟四集潤臣齋中得觀宋槧蘇詩以姚惜抱先生
題句分韻得會字

蘇公大名七百年。日月無容更摹繪。顧施注本商邱藏。
鈔版流傳記嘉泰。元明學人未珍異。直以表章須盛
代。蘇齋雅集歲未百。復有吾曹繼茲會。異錦裝池蝨蝕。

微尚齋詩集卷三

十

餘卷尾標題盡名輩。今古遙遙不相接。幸有斯文通沉
澗。我從宣城受詩法。上溯樅陽有流派。師資凋謝百無
成。俯仰存亡一長慨。公詩與書非意造。用法意常餘法
外。每言世俗筆苦驕。自作何矜風雨快。後賢效顰漫藉
口。滄海橫流安足怪。但夸嬉罵皆文章。豈識恢奇本忠
愛。梅翁與我數道此。孤論終難息羣喙。此本何時入君
手。論價奚啻連城倍。公昔曾題石鼓詩。物理細思滋歎
喟。人生百年一彈指。何有觀空等亡賴。已知過眼卽雲
煙。安用題名增癩疥。潤臣屬余題名其末謝未敢也爲君更作牛相語。
且鬪樽前身現在。

潤臣汀鷺招小集以歲晚務閒分韻得晚字
簿書心骨勞羈旅歲時晚月夕得佳招華鏡明酒盃市
近心自遐語長燭疑短緬思癸甲歲畿輔告兵燹豈惟
游讌稀車馬見亦罕人心有憂懼天運或旋轉今來吁
可怪紛華眩愁眼長衢羅車騎列肆沸絃管神州尙荆
棘茲疾非疥癬遵時人豈非見事吾乃淺千愁散一醉
於俗固未免安得魯陽戈揮日三舍返

已未

平陽秦斤拓本

羸秦政事無足論金石刻畫殊彬彬三千年來茲器存

微尚齋詩集卷三

十一

土花繡作蒼龍鱗岱宗之罨跡已湮嶧山木刻肥失真
此最近古良可珍無事取證獵碣文積古齋識以此器殿字證石鼓

人日繡山年丈招同朝鮮李藕船樞使小集分韻得至

字

今宵酒如澆劇飲不成醉人日十分寒吟朋千里至李
侯東國彥遠紹延陵季一別忽至今歲月不我賞問年
驚老大未稱平生意官堦聊復進詩律乃愈細擁書送
夕陽開樽納秋氣藕船自誦近作有大開酒戶迎傾倒氣高擁書城送夕陽之句
四坐賓棖觸十年事伯蒼與石州論文舊相契盈川喪
楊令吳門失梅尉自君來上都昔游幾人逝金君殉貶

所謂秋史中外理一致吾曹工感慨正坐稍識字相逢
且歡欣時命安足計

悼仲修

汝生不識父孩幼有文性祖母爲汝言兒父苦無命遺
母棄妻子孝慈事未竟汝時方五齡趨前笑而諍謂天
蓋有數難以人力競顏子亦蚤亡何以稱亞聖當時賞
汝慧豈謂數前定自汝來京師所業與年盛孔疏及鄭
箋了了辨途徑餘事爲詞章娟娟冰雪淨吾衰百無成
倚汝爲後勁名山有遺業它日或吾訂去年喪汝兄摧
傷今乃更天心固仁愛容此鬼伯橫已矣復何言老淚

爲汝罄

微尚齋詩集卷三

三

再集致經堂藕船以春明話雨圖屬題

海東故人別十霜忽乘天風來

帝鄉憶初相識自

慶子筠篲角酒韓與張少年慘緣居末坐祇今髭鬢餘

滄浪問君訪舊幾人在清酒和淚沾衣裳我家宅相君

未見經史貯腹如曹倉機雲經歲並殂謝每值文酒摧

肝腸神仙與人異哀樂笑言滄海三栽桑東風亦似無

喜愠又欲吹綠千垂楊人生有情那堪此縱復沈醉憂

難忘君言宦游不得意逝將歸老煙水旁我聞此語益

氣索畱君無計心彷徨方今

聖人貴柔遠萬國重

譯爭梯杭東邦職貢二百載時有文士朝
君努力持使節人日年年升此堂

天閨願

次韻答潤臣

唐衢唯善哭中散豈能駟夜漏渾難曉秋懷不復春琴
書身外物親舊寢中人賴有今宵酒狂言得任真

題潤臣橋西老屋圖送別

交君恨已遲別君何太速風昔抱孤介高門畏投足豈
意凡下姿能青嗣宗目薊門饒風沙三月草未綠浩蕩
千里程蕭條百年屋君行歎飄搖我畱苦羈束丈夫志
遠大恥作窮途哭壯語聊相寬沈憂亂心曲別酒氣酸
辛離歌聲急促明日望都門寒煙隔喬木

微尚齋詩集卷三

三

讀吳蓮洋詩卷

藏園有詩論邊幅譏蓮洋詆訶連新城憑臆爲雌黃吾
觀蓮洋詩乃勝忠雅堂漢唐作者遠詩道無專長德業
非昌黎亦以餘事嘗淺學工剽竊高材恣拍張蓮洋淡
蕩人天然叶宮商有如飛行仙驂鸞睨八荒斯文有公
評吾豈私其鄉顧念蓮洋時皋夔盈廟廊海隅正清宴
衣食饒耕桑家居近中條排闥山青蒼昆侖九曲水詰
屈環書牀俯仰何不樂觸緒生悲涼乃知志士心大異
兒如腸夫豈爲一身嘔號學寒蠶我生百年後里社遙

相望執鞭。無由敬此。一瓣香。

韓齋餞別圖爲潤臣題

叱馭蒼皇決遠行。觚稜回望不勝情。毛生捧檄甯干祿。杜老哦詩盼洗兵。鳳閣書雲成往事。鶴原聽雨似前生。橋西老屋如重過。依舊雙槐綠影橫。

寄子治

側聞投筆赴戎機。一出興安報解圍。天下自關儒者事。樽前應惜故人非。琴書寂寞吾將老。江漢蕭條汝未歸。寄與樊南惆悵句。春來所得是沾衣。

送別汀鷺

微尚齋詩集卷三

西

楊侯經術今無儕。時人走避匡鼎來。餘事作詩吾所推。興來一飲三百杯。玉山屹立無時頽。長安春風桃李開。文章邀俗遭世咤。卞和再躬非身災。楚人自失荆山環。監河大帥知君才。忽然躍馬辭金臺。李君餞別傾金壘。四坐無言班馬哀。九陌車馬馳黃埃。來去了不關吾懷。胡然使我腸九迴。半生孤學心自猜。與君臭味同岑苔。勸君盡醉休徘徊。緘書寄我江南梅。明年起醵聽春雷。頌臣屬題。尊人光河先生夜鐙圖。

折蓼畫荻古所欽。天厚孝慈非自今。惟公聲績炳寰宇。公昔圖此猶青衿。同時執友盛期許。乾嘉名作多如林。

兵戈轉徙畱片羽光價不翅雙南金丈夫非慕五鼎食
謂此差足娛親心板輿迎侍列騶唱當時悲喜知難任
後生讀書感身事卅年歲月何駸駸強言菽水奉歡笑
樂事一往不可尋他年富貴亦時有椎牛但祝神來歆
如公遭遇豈易得題詩躑躅還悲吟

戲答雁峯

干將不以刈艾蒿盤錯之任非鉛刀不鳴受烹材見伐
造物困汝安能逃我生性僻愛文字廿載爲郎今二毛
長官有意拔沈滯謬以庸陋參英髦炎窗署牘日在背
更事敲朴聽嘯號讀書識字竟安用政與胥史爭賢勞

微尚齋詩集卷三

五

憶昨解官臥鄉里二三鄰交頻招邀山城六月不知暑
文窗四啟風刁騷北山之游更奇絕松聲怒湧錢塘潮
軟紅一墮又三載回首故山心鬱陶中書已禿那稱意
孔方有書頻絕交君詩雖工意乃過不我矜恤翻相嘲
羨君官閒月緡厚何不觴客傾葡萄答詩索飲聊戲劇
郊寒未足當韞橐

雁峯次韻見答復疊前韻

寸田雜蒻蘭與蒿欲自芟難無并刀君詩勁似大國楚
拔旆投衡吾欲逃自言新居美花竹日調冰水烹溪毛
解衣盤礴待月上偶亦開徑延時髦鳳翔千仞自快意

豈知下有寒蟲號我方觸熱秣車馬坐擁一牘忘飢勞
人生稟受各殊分清福詎許尋常邀君家湘水幽絕處
文章風氣沿屈騷展箋一讀百病失恍隨枚叔觀秋潮
年來籀頌汨神智欲混帝虎迷陰陶偶萌結習誰講貫
舊游雲散無新交心聲所發異甘苦我非怨訕君非嘲
側聞西戎近款塞競貢宛馬隨葡萄吾儕不試且宜飲
禮法是非從二豪

張竹汀主事贈詩賦答

王君說子不容口驚喜新詩入吾手未知於古誰伯仲
止論今時豈多有隻搜險韻出新意蟻垤羊腸絕塵走

微何齋詩集卷三

去

清秋披雲見華嶽下視吾詩如培塿我昔學此無師承
緒論粗聞自梅叟稍從縱陽溯豫章盡埽鉛華等塵垢
才孱學淺事牽牽少日聰明亡十九邇來詩論薄韓杜
坡谷豈堪當擊掊有如評書陋義獻並廢斯冰用蚪蚪
西子安知里婦曠大瘦翻視全人醜從來學古患太似
揚子元言空覆瓿君詩勝我意趣同早識公它能取友
瓣香玉局吾豈敢惜衰一編常頰首公餘退食許過從
更發狂言傾斗酒

竹汀評余詩於古人似東坡於今人似惜抱

竹汀翔雲雁峯招集慈仁寺分韻得聆字

我生後名輩猶及見典型酒壚一憑弔存者稀晨星冥

契嗟已逝發言眾莫聆與君共曹署泛若同池萍新詩
忽枉投秀句如發礪嘉招集勝侶清晝携禪局兩軒樹
蕤蕤六月風冥冥虛堂敞佛畫恍惚來百靈灑然神觀
肅不復知丹青此地昔初遊協洽歲在丁張侯實初始
顧祠薦芳馨開成石井闢輦載自郊坰作亭庇風雨脈
泉漱清冷張侯古狂者醉膽吞滄溟探懷出險語俗耳
愁驚寤同袍六七子談詭無畦町中間更廢舉堂廡非
故形昆跡及燕泥縱橫滿空庭欲話舊時事欷檐語風
鈴斯人久宿草安問井與亭人生等蜉蝣上壽鮮百齡
願效箕子醉無爲屈原醒斜景忽西匿僕夫催展輪主

客並頽然之豪如螟蛉

微尚齋詩集卷三

七

海秋屬題母孫太安人遺畫

兵燹嗟遷播神靈與護持不堪題畫日回憶授經時性
僻宜官冷兒孤念母慈鮮民同此恨永負蓼莪詩

題朱厚田詩集卽呈逸蘭

弱齡負意氣謂若恆壯少預計今年所期無不到論
交得王子齊年頗同調時於風月晨互析文字妙兵戈
促離別歲月變形兒須眉各老蒼神智坐銷耗狂奴態
空存俗士頭斐掉觥觥太傅孫風雅歷堂奧挾瑟過齊
門雖工非世好辱投錦繡篇久乏瓊瑤報大厦需棟梁

羣才在廊廟所媿非昌黎薦士恐蒙諍榻期焚筆硯且
復從戎纛殺賊取金印男兒安可料不然向煙波短簑
學垂釣

悼潤臣

南客相逢御水濱言君消息共沾巾家逢多難生無樂
官未真除死尙貧欲問平安成永訣更傾懷抱向何人
橋西文酒淋漓地華屋山邱迹已陳

次韻答友人

兼旬應訝報章遲潦倒塵容負酒卮規句未窺三易法
研京已悔十年思欲迴滄海知無術竟入山林會有時

微尚齋詩集卷三

丈

康濟正須英妙質莫拋心力苦吟詩

楊少初兵部以西法爲余寫真絕肖賦謝
明鏡肖物形物過形亦渺鏡影儻長存丹青失其寶楊
侯出新意人力奪天巧頤鎖具凹凸須眉澈分秒平生
半面人婦孺見能曉神魂疑被攝情悅不自保吁嗟技
至此相識悔不早君看鏡中人已非昔時好更憂自茲
去愁病日衰老慚負幻中真我戲君絕倒

賢婦行爲邊仲思室高恭人作

邊氏有賢婦事姑如母母曰婦賢里黨無間然 夫子
遠行役妾畱奉高堂脯脩菜栗醢酒漿問膳視寢左右

無方姑偃息妾歸房課兒書與詩達旦聲琅琅 威姑
終天妾願以身殉哀毀骨立不自意全秋霜春露年復
年憶姑涕泣漣漣 夫子遠行役妾歸故里狂賊震驚
百室流徙妾豈不能徙幼習書史宋宮災漸臺水自古
有死願謂傭媪汝以幼子亡我死於此 如天之福夫
子歸其鄉會集紳耆練鄉兵鬻我明月璫具餼與糧裂
我繡羅裳製旂與常服志成城士氣倍賊噤不敢窺界
室家復完曰歸京師夫子勤其官家事妾所治驚憂
勞瘁身不支奄奄一病淹牀帷君欲茗飲強起具之君
言少休妾心悲飲君無幾時妾休無窮期 邊子爲我

微尚齋詩集卷三

言氣結心煩冤世上庸俗女婦老壽而乘軒不慙遺斯
人天胡忍旃我詩其事告千萬世曰此婦德之賢

同人小集分詠古人得希夷先生

誰識庖犧一晝天先生高臥抱遺編十年奔走緣何事

世傳希夷詩有十年五季兵戈騰此賢自古傳經多隱

蹤跡走紅塵之句逸於今識字幾神仙野花嘯鳥渾無恙安得從君太華

眠

天衣飄飄... 意全... 詩集... 卷三... 九

微尚齋詩集初編卷四

代州 馮志沂 述仲

庚申

李藕船寄酒器

故人同有杯中興，遠託星槎寄一瓢。
本為獨醒方至此，豈知孤醉轉無聊。
關沙渺渺魂堪斷，歲月駸駸鬢欲彫。
昨夢與君攜手處，清溪門巷竹邊橋。
我家溪畔路歸夢竹邊橋藕船舊句也

前詩意有未盡復次藕船來韻

春風又綠舊時波，萬里懷人一獻歌。
別後清歡憑夢續

微尚齋詩集卷四

一

年來讀律較書多，名山大絕千秋望。
故里其如四壁何，君抱奇才宜著作。
未應身世託煙蘿。
來詩末云此身晚計休相問好向牆

東隱 薛蘿

大雪樊文卿封翁劉子重主事見過談飲竟日文卿有

詩次韻

風雪連旬日，經過阻並門。
衝泥良友聚，撥火夜談溫。
轅馬疲仍駕，子重駕車之贏方病跛。
林雅鍊不喧，未須身障簾。
妙墨映清尊。

雁門童子行 從姪灤山巡檢焯之子

童子十四名，福基瑤環瑜珥玉。
雪姿早有才，語驚父師。

弱齡能解易與詩。賊窺潛霍遭劫持。身非不能走險巇。
恐母不免躬嘗之。日夜念母惟涕洟。豺狼安識字孝慈。
聞兒夜哭爲心悲。裏中短刃勤磨治。誓不與賊生同時。
賊走藥肆方晨炊。兒喜竊謂計可施。裏毒乘閒投釜錡。
賊十餘輩皆橫屍。偉哉童子真權奇。自仰餘藥甘如飴。
殺賊十數賊不疑。委棄野寺不以隨。荒山兵後難求醫。
一瞑不復瞻庭闈。異哉童子能爾爲。我欲再拜呼以師。
忍以譜牒僑孫枝。孰狀其事言。天堦謂天蓋高蟻。蠱
卑題詩淚墮如縷縻。告千萬世無媿詞。

次韻畬霞舉

微尚齋詩集卷四

二

暑日不到地。溼雲常在天。林煙低過鳥。簷瀑亂鳴泉。
國愁霖日家山望。澤年清郎枉佳句。一爲拂朱絃。
未嫌衣帶緩。無那鬢霜新。歲月頻催老。文書漸困人。
暫欣詩卷對。轉畏夜燈親。近得求全毀。偷閒向一旬。

同官張石洲告歸送別

刑官不易爲。況乃在今日。中材當末流。念此忘寢食。
張君吾畏友。判事無停筆。塵牘如牛毛。羅羅在句臆。
吏人習惰媮。頗苦程不識。長官意方殷。掉臂去何疾。
比歲才俊多。動侵司寇職。矢來每無鄉。安能鐵其室。
嗟余生苦晚。老輩去無迹。君在猶典型。君行孰匡拂。
眾人漫悠悠。

賤子空惻惻。黃河從天來。秦晉一川隔。中州方戒嚴。吾
土豈暇逸。似聞急租稅。更勸練兵卒。願君益審計。高臥
古難必。不見謝東山。終爲蒼生出。

哭德山

人生罕百年。百年亦夢耳。而此一夢中。頻見故人死。小
別甫再旬。不謂君至此。心知憂傷人。腸熱難自止。黃君
痛尤深。欲語淚瑩背。設端強一噓。了不見可喜。我昔未
知君。介紹自槐里。識君稠人中。蒼然古壘洗。餘事工詩
文。至性在倫紀。遇變才恢恢。談笑禽封豕。胸中萬武庫
惜哉。試無幾聞君。有夢徵仙班。虛左俟吾意。仙與人性
情亦相似。魂魄猶有知。忠孝詎能已。願排閭闔叫早使
兵戈弭。趙鞅在帝旁。鈞天樂方起。

微尚齋詩集卷四

三

次韻再答霞舉

未判浮生事。蒼茫欲問天。空銜填海石。深愧在山泉。釀
酒誰干日。論兵漫十年。封侯縱無意。安用直如絃。
薄雲收晚霽。萬籟一清新。淡月如窺客。疎螢故近人。難
成此夕寐。益念平生親。早歲桑蓬志。蹉跎近五旬。

繡山年丈招同朝鮮李菊人鴻臚飲分韻得進字

藕老醉此堂。歲月去如瞬。宗英得高弟。下筆有餘韻。韓
齋能好事。結客盡豪儁。沈李浮甘瓜。不覺觴叟進。濃雲

閣涼雨几席已含潤撫今惜景光懷舊感時運李侯今
健否多恐雪侵鬢矯首望扶桑欲飛不能奮君歸侍函
文萬里勞寄訊倘詢近何爲老矣思一郡

題王樓邨先生十三本梅花書屋圖用卷中姚惜衰先

生韻同霞舉

詩人非好奇本與世殊嗜醒固抱孤懷夢亦謝塵事仙
翁親付與理常事非異樓邨逝已遙清芬歎誰嗣我輩
世緣深分爲花所棄愛此三尺圖寒香溢文字茫茫翰
墨因鬱鬱今古思行將老煙霞艸木吾同類調羹彼何
人撲筆發長喟翠羽寂不聞青燈照無寐

微齋詩集卷四

子衡隨 欽使練兵江南賦此送別

自從金陵失局鑰環視虎穴無人探武林一陷益橫決
金甌欲畫江以南潢池盜弄古亦有十年不息民何堪
李君默默百寮底 新命忽使軍謀參轉因王事得將
父豈徒畫錦榮歸驂此邦民力困梳櫛賊取不盡官能
諳算緡計畝法屢變自謂莫四殊朝三時賢藉口豈無
說懼乏軍興非吏貪取民果盡給兵食政使九死民猶
甘柰何疲氓竭膏髓止供國蝨爲淫酣君隨使節事文
牘定有至計療愚慙山陽魯麥昔借箸瞭然灼見非空
談願搜奇儁獻幕府筮易無疑朋盍先年來繼浪文字

資

飲墜歡一往如優曇離懷雖苦強自力鋒車觸熱行趁
趨鄙人往事不足道望君爲洗儒生慚

答海秋

百詩昔作淮上客鐫印不忍忘潛邸上元許君我同里
百年歸夢依松桺詩篇辱贈久不報晶瑩玉版書銀鈎
細尋紙尾忽驚歎五百餘日如奔流當時吳越尙安堵
已爲蒼生叢百憂問君今日復何道何不借箸陳良籌
君言世事姑未暇且玩詩箋追昔游漢陽葉仲去不返
楊郎久客東諸侯長白桂君晚相識樽前一別成千秋
同袍處者不五六李君又去知難留況因多病遠杯杓
更用何物消羈愁人言我僻君更甚坐有新交常掉頭
醉爲吾鄉友吾命願相啣沫無相尤荷花欲放新釀熟
共君日醉城南樓

廣兒殤

兄子本猶子況負如螟蛉孩提不好弄學父塗丹青讀
書一再過熟若水瀉瓶吾衰無遠志喜汝能甯馨悲哉
丙辰夏一病殘汝形形殘亦已酷今又促汝齡念我罪
狀多宜爲天所刑云何殃及汝神理殊冥冥自從兩甥
亡淚皆今猶熒垂老復聞此吾悲汝豈聆牛梁一片土
隣汝魂伶仃汝祖墓不遙汝其學趨庭虛名爲父子奄

忽終一星蓋棺不汝撫魂夢慚汝靈淒涼百年內展轉
終夜醒鄰家母呼兒蒙被不忍聽

答酒傭

黃塵蔽九陌白日西南馳獨居無好懷出門迷所之故
人念同病濁酒呼共持氣索語不豪臨觴如病癡旁有
酒家傭微笑前致詞得酒合歡喜胡乃屢嗟咨官昔黠
朝籍年少未有鬚云何二十載局促猶曹司與官同升
者袞袞多華資既幸無罪過何故見棄遺得無官性情
不合世所宜謂當悔而改何但愁歎爲失笑謝酒傭酌
汝酒一卮汝語信不妄吾曷非汝知

微尚齋詩集卷四

六

次樊文卿封翁夢境韻

咫尺雲迷海上山仙人居處有無閒金牌久決和親策
玉節頻馳供奉班失水鯨鯢仍死鬪升天雞犬盼生還
塵寰徧是桃源路輸與漁郎步履閒

次文卿中秋對月韻

昨歲思今夕狂歌百尺樓歡場俄一瞥佳節漫千愁虎
豹天關夜魚龍海國秋浮雲空蔽月不爲掩旄頭

游仙

羽葆紛紛出玉京神霄有路望分明雲階月地高寒甚
水珮風裳躑躅行碧海長鯨何日翦丹山羣鳳爲誰鳴

塵間多少拖腸鼠妒殺雲中犬吠聲

讀史爽少鶴

黠虜原輕漢羣公早避秦幾聞風滅火眞見海揚塵玩
敵成開戶論功失徙薪從來謀不用豈謂國無人

書憤

嚴城未改舊金湯塞上旌旗接豹房魯史自書周檄火
秦兵猶責晉侯糧方壺圓嶠波清淺玉砌金鋪事渺茫
環衛期門皆勁旅可無一矢向天狼

書感次董研秋檢討韻三首同霞舉

中酒無勞問濁清擁書聊復當專城黃精山雪嗟生事

徵齋詩集卷四

七

蒼狗浮雲閱世情高樹不堪秋氣早小窗猶戀夕陽明
叔孫絲繆多新禮迂拙應歸魯雨生

宦情良已淡世事覺如何鹽鐵尊桑孔方書棄緩和古
人隨代遠寒士得秋多亦有龍泉劍塵封久不磨
祕殿閒金屋離宮鎖玉墀但求誅斬尙未敢怨張儀我
醉方憂醜人歌詎解悲豺狼天所赦願且問狐狸

少鶴次余辛亥歲贈詩韻見示依韻賦答兼呈霞舉

少長憂患中恐先朝菌死云何未衰老聞見遂至此道
逢佩犢人衣冠劇華詭柔遠古所尙奉之過驕子四海
苦用兵誅求今未已鹿窮或走險絲亂恐難理捐金等

邛山所易惟一紙馬牛暫歸放朝野大歡喜尚惟
主心永念初政美寒儒亦何求浮湛眾人裏

文臣不愛錢武臣不惜死大哉岳侯言前聖甯易此宋
金轍匪遙世變日趨詭腥膻污黃圖溝壑轉赤子天下
方倒懸猶虜心未已豈暇憂元元旦夕昧生理白金爲
上幣黃卷成故紙空作楚囚悲能堪鄭人喜北門傷我
艱西方懷彼美悵望千載前蒼茫百年裏

霞舉三疊少鶴韻見示意有所感再答

寇退我猶生寇來孰當死曳兵未百步相笑成彼此異
哉今所聞薦贖恣奇詭巫臣方竊妻華元甯易子逴誅

微尚齋詩集卷四

猶有說行賞或可已吾欲逃昏冥萬事付不理不然戒
妻孥蓋棺多置紙復恐造物心頗同俗憎喜全人脰肩
肩大瘦固爲美安得從從長房跳身一壺裏

不如大國奔分作小臣死復與數公游始願未及此性
命爲人操得失那自詭豈其效焚書欲安反側子不廢
何以興諒彼非獲已生平所遭遇一一難自理功名猴
入袋事業蠅鑽紙文告滿通衢頗有太平喜列肆漸懸
標誰家新釀美共君訪伯倫爛醉竹林裏

天驕

天驕百里尙雲屯白幟搖搖日色昏晉國豈貪嘉父幣

漢朝甘讓夜郎尊。雷都久已無宗澤。料敵何人似柳渾。
猶憶林公初秉節。島夷低首拜轅門。

詠史呈霞舉研秋

明允論辨姦。荆舒匪其讎。哲人慮未然。惟恐言之售。
國忠激祿山。哀哉誠拙謀。操縱苟自己。已貽宗社羞。
何況覆餗材。一發不可收。桓桓陳將軍。裂眦念主憂。
馬前誅佞賊。忠義垂千秋。

次研秋和友人韻二首同霞舉

殘書昏燭影。虛幌溼茶煙。世事從康嬾。浮名謝觸前。
六師猶宿野。三輔正籌邊。漫灑憂時淚。吾生亦偶然。

微尚齋詩集卷四

九

慷慨從軍樂。蒼茫對酒歌。百年空復爾。千古竟如何。
憂患新知少。承平往事多。遠慚韓吏部。擿藻頌元和。

和研秋初冬夜雪韻同霞舉

酒醒衣裘薄。詩成硯水凝。虛窗明夜雪。衰鬢怯寒燈。
煨芋知無分。尋梅病未能。新霜才幾日。倏忽到堅冰。

次研秋家書韻同霞舉

觸我鄉關思。同君去住難。徂東非吉日。直北是長安。
事往渾無據。憂來未有端。不眠成坐起。失計悔爲官。

次翔雲韻同霞舉研秋

國是方難定。吾生敢告勞。創痍三輔卒。裘馬五陵豪。
短

景催長夜清愁付濁醪。驅黃均一櫪。多謝九方皋。
殘書愁尙擁客。感醉難忘。危甚焚巢鳥。癡同入肆羊。升
沈三愠喜。今古一悲涼。袞袞諸年少。何人似洛陽。

卽事次研秋冬夜韻

識時羣彥入山深。老我塵埃髻雪侵。早歲一官成繫戀。
頻年九日罷登臨。舊游與夢都無迹。衰態如期各見尋。
亦欲朝餐適莽蒼。畏聞霜葉下空林。

少鶴約過翔雲聽琴翔雲以二詩見東讀之有感次韻

奉答同霞舉

君言多感觸。我痛亦人琴。白首平生約。黃墟何處尋。七

微尚齋詩集卷四

十

絃空在御再鼓不成音。誰爲子皮哭。吾知醜蔑心。
蒲柳與松柏。冰霜同一時。虛名成濩落。壯志迫衰遲。更
住原非策。能歸已後期。此生吾自斷。嬾問蜀人著。

與客夜話作呈霞舉

亂後還樽酒。相看愧此身。公卿甯有策。盜賊亦無人。行
客徐徐返。除書日日新。誰爲杜陵老。灑血痛蒙塵。

研秋效山谷體枉贈賦答

君處玉堂蕭爽地。清羸端不爲塵勞。書從涪老窺褚令。
詩溯樊南逼楚騷。媿我無文求狗監。看人有口說龍韜。
此時正用吏持事。孤負黃花對白醪。

海秋招集萬齋少鶴以霧淞用惜抱韻詩見示同次韻
文書堆案眼爲遮背燈寒縮如棲雅開門視夜忽驚叫
南鄰枯樹冬生花元陰不肯闕光怪銀柯玉幹交槎枒
故人詩箋墮我側頓披宿霧揚天葩繁憂鬱鬱泣真宰
好語一一穿珠珈想當對酒翦明燭空庭奇石增餘卻
窮冬長夜欲無曉思泛東海觀朝霞豈知玉事有敦迫
明晨更膏衝泥車感時頗爲達官怕占歲復覺卿言佳
從來休咎苦難定俄頃百緒紛如麻蚩尤作劇一何虐
藍關雪擁歸無家坐令身世落愴怳今夕夢也還真邪
吾儕一飯難自飽動憂四海甯非夸且當貰酒共醅酌

微齋詩集卷四

十一

鏡中一任霜毛加自古飢腸出奇語昏燈細字隨欹斜

贈翔雲

眾爭方斷斷掉頭去若挽舉俗大笑之黃子曾不恥士
無尺寸柄坐視四郊壘皦然平生心持用報天子

題傅壽毛墨竹

畫長六尺闊二尺竹石奇古自題一詩云一心有所
甘是節都不苦寥寥種竹人龍孫復何所

壽毛昔以我名集詩膽已欲無千秋偶承家學寫生竹
意中豈有文湖州填胸奇氣鬱不收老榦屈鐵枝盤虬
龍孫何所勿須問黃竹闕寒行未休

贈李東樵

會操雅調得知音。憂患餘生鬢雪侵。廷論只今誰汲黯。
殺人從古屬曾參。文章已謝庸流福。岸獄知非聖主
心。惟祝九重寬大詔。和風一爲破沈陰。

冬夜集翔雲齋中聽琴限牛字

我初學琴自李侯。焉逢敦敦客并州。明燈促坐看挑勾。
宵寒漏盡不肯休。婦孺寂聽無喧咻。時方下第冬未裘。
平沙一曲十日留。七絃塵封三十秋。黃壚邈絕亡應劉。
今夕何夕懷舊游。使我對酒生百憂。寒泉漱石咽不流。
微風暗度叢篁幽。丹山孤鳳思其儔。元鶴警露鳴相酬。

微尚齋詩集卷四

三

五音盡希十指柔。於詩王孟文曾歐。並時鍾期不可求。
長安萬戶聲。齟齬登木之雉鳴。蝨牛識曲誰似江東周。
南鄰北里紛輿騶。競呼紅袖彈箏篴。吾曹何事如楚囚。
共君舉白還相淨。蒼梧雲遠天悠悠。

次硯秋見贈韻送別少鶴卽酬研秋
雪滿關河送遠行。都門風樹作邊聲。兵戈未息天心悔。
離別無端客意驚。夢裏雲山常北向。醉中星漢復西傾。
羨君玉署蕭閒甚。早晚君王記姓名。

題元耶律文正公遺像

像歸董雲舫郎中爲穆相國家故物穆公相業自有

公論惟當時黨籍有士類而無屠沽撫今追昔有足
感者率題志慨於文正事實不暇詳也

天命真人起沙漠。角端一言止西略。君臣際會幸同時。
展卷英風動寥廓。五百年來迹已陳。故家手澤尙如新。
豈惟讀書寄遐慕。更憶當年藏畫人。

少鶴畫梅見贈

昔君旅宿夜舉盃。敗牆忽見橫枝梅。走呼鄰生坐同賞。
寒香習習隨風來。追觀始悟畫在壁。驚叫不顧旁人咍。
想君從此得畫法。腕底倏忽春風回。早誦暗香疏影句。
夢魂不踏江南路。都下瓦盆盈尺花。人力屈盤少生趣。
愛君放筆爲高枝。亦似君書能崛奇。只憐庾嶺隔天末。
烽火鄉關生遠思。

微尚齋詩集卷四

三

觀物

白衣蒼狗漫紛紜。一見於今勝百聞。庾亮猶能拜陶侃。
薛宣何止吏朱雲。飢鴟得意鴻遭嚇。老鶴方鳴蟻策勳。
我欲驂鸞游八極。九疑深處覓湘君。

和硯秋除夕祭詩韻

晦魄循故常。人情重茲夕。四十七歲除去我。已如客誰
家。少年子醜酒呼五。白自笑老成翁拈髭向空壁。

辛酉

元日口號

爆竹喧初定。風來已覺春。輕雲烘煖日。殘雪潤芳塵。塵
市人聲好。街衢物色新。東華退朝路。天仗幾時陳。

醉中重過石州故居

腹痛無端酒乍醒。故人門巷此重經。半生虛願棲雲築。

石州嘗卜築雷橋曰小樓雲亭千古傷心問字亭。後死無成頭已白。先

生長。逝眼誰青。當時一日三秋意。十二年來總淚零。

贈朝鮮申琴泉中樞

紫霞有詩扇。東友昔貺余。君家文人行。筆力追髯蘇。喜
君繼其蹤。對客能疾書。初若不經意。放手皆瓊琚。星軺

徵尚齋詩集卷四

四

盛賓介袞袞。多英儒方權。念當別執手。言欲獻達人。縱
遠覽四海。猶庭除誰能苦。相守老作工。巨虛猗猗起。西
方生人正艱虞。懷哉各努力。無歎蹤跡疏。

同霞舉翔雲招少鶴海秋雲舫研秋及朝鮮申琴泉中

樞徐漢山尚書趙蘭西學士小集以海內存知已天

涯若比鄰分韻得鄰字

近局招邀互主賓。談深不厭酒行頻。感時難抑飛揚氣。
報國空慚老大身。四海衣冠瞻北極。百年文獻在東鄰。
關河此別應相憶。好折梅花寄遠人。

次文卿見贈韻

世事惟堪大白浮。生涯還似上灘舟。貧交偶聚難成醉。
詞客多悲不待秋。蘭省宦情甘寂寞。草堂歸計苦淹留。
風塵湏洞行安適。且枕殘書作臥游。

題范月槎學正仕隱圖用翔雲韻

索米隣臣朔。占星羨少微。琴書聊自適。霄漢任羣飛。
白髮誰能避青山。不易歸強言託中隱。無那此心違。
聞道征南卒。連營得上游。花門仍雜虜。米賊又中州。
桂玉愁明日。兵戈夢昨秋。茫茫何所屆。人海一虛舟。

翔雲以海秋移居同巷有詩志喜賦此奉柬

買鄰自昔須千萬。黃子端居得許君。樽酒不勞牆上過。

微尚齋詩集卷四

五

書聲時向枕邊聞。花晨月夕開三徑。飲社吟壇角兩軍。
憶我同袍曾比屋。十年戎馬各離羣。

東海秋

聞君將卜鄰。我喜不能寐。何意再浹旬。五車書未至。黃
君詩志喜。如獲百朋賜。東西隔車轍。宛在一室內。索居
固吾分。安敢怨遐棄。有如失楚弓。頗復強人意。人生相
知心。不以遠近異。曹司朝莫見。各各殊臭味。望宇得二
難。惟我戎車利。暇日倘過從。無勞題鳳字。

題吳桐雲中翰匹馬出關圖

曾驅匹馬向秋風。一載并州作寓公。似我因人真錄錄。

願君投筆莫匆匆。文章已恨相知晚。樽酒應憐別緒同。
不用棄繻驚小吏。早知韓范在軍中。

出都書所見

惘惘去親故。悠悠卽長道。曠野惟黃塵。殘春未青草。孤
樹擢新碧。亭亭如自表。下馬撫之歎。念汝顏色好。古柏
多爲薪。柔姿慎常保。

崇墉環帝京。一隅新版築。人言庚申秋。豺豕所搪突。

問誰秉國成。謂彼莫予毒。黎庶猶痛心。將軍但皤腹。魏
尚今不存。安論頗與牧。

對食戲作

微齋詩集卷四

六

早服先師言。未敢恥惡食。柰此盤中殮。蟲臂雜蠅翼。未
遑辨臭味。觸眼氣先塞。始信古人言。加餐須努力。

卽目

近郭已昏色。遙山猶夕暉。沙晴轍迹淺。野曠行人微。愧
負羸驂力。愁看倦鳥飛。塵勞片時息。茆店亦如歸。

古北口

絕塞限中外。穹廬密相傍。赤幟射日明。礮車森內向。
翠華北巡後。於此資保障。士卒奔走餘。安居氣驕亢。追
思昨年事。痛惜老成喪。將帥苟有人。神京固無恙。輕騎
扼歸塗。閉關絕供帳。未肩臣妾之矧。與交揖讓吾聞重。

仗

洋水險惡非一狀彼敢傾巢來厥志頗難量復思蔦賈
言地險未可杖鎖鑰誰北門停驂一惆悵

憶伯言先生語

昔年伯言交論史慨以慷每言造物心難以人意量南
宋主和者今所謂不祥當時都顯榮後嗣咸熾昌持較
宗岳儻年命誰短長我輩坐讀書難改婁直腸太息憶
此言非用自感傷

灤陽

灤陽行殿鬱崔嵬仁廟巡游歲一回遺老不知今昔

異自夸重見六軍來

微尚齋詩集卷四

七

青石嶺遇雨

露滋煙凝垂柳低柳陰沙路淨無泥上山十里濛濛雨
添出山前無數溪

重過古北口

帳扼千盤阻樓凭萬仞梯軍容原整暇客意轉淒迷白
日臨關近青天出塞低微才慚獨對未敢請丸泥

灤陽歸途作

塞外歸來始覺春村村榆柳各鮮新亂山合沓似無路
平野蒼茫微有人久羨田廬容懶拙尚思談笑靖風塵
至尊日夜憂黔首花石何勞採獻頻

憎驢鳴

蠢爾無長技，驚人底不平。怪渠王武子，嗜好異人情。卽事。

清磬出林際，行人心灑然。誰知結茅者，辛苦索金錢。

沈仲復編修，招陪朝鮮朴璵卿，小飲寓樓卽席賦贈。

三春不雨塵暗天，出門四顧心茫然。故人招我坐小閣，

坐有海客衣，翩躚詩書充腹發。奇秀疏髯飄拂，疑神仙。

亭林絕學世誰繼，海外乃肯珍遺編。嗟我童幼好奇服，

一落紅塵三十年。米鹽簿領汨神智，寸心有似不墾田。

恨君來游今已晚，宣城上艾皆沈泉。瓣香肯下石兄拜，

微尚齋詩集卷四

六

時人任笑元，章顛劇談果。勝十年讀此會，欲遡蘭亭前。

沈君官冷惟青氈，醉客不惜囊中錢。飛觴揮翰未云已，

蒼蒼暝色催歸鞭。一麾行復向江海，它日念此增憂悵。

浮雲聚散那足道，愧無長策弭風煙。歸向琴泉訪詩老，

相思倘有停雲篇。

次韻贈朝鮮趙秋潭

宦游真似燕移窩，彈劍新成出塞歌。世事儘堪長歎息，

名流何意暫經過。樽前歲月青春老，鏡裏功名白髮多。

君有詩聲盈日下，未知雛鳳較如何。

贈申眉南

半生心在白雲窩，抑塞空餘斫地歌。
紫塞際天雙闕迥，黃塵埋雨一春過。
凋零酒伴歡情少，冠蓋京華昔夢多。
江海一麾慚報稱，枉君新句似陰何。

贈宋竹陽

休問先生安樂窩，相逢燕市且悲歌。
華筵乍喜朝簪集，隘巷難容使節過。
水淺蓬萊驚世換，國鄰君子信材多。
別來三日增悒悵，千里過歸奈若何。

題裘小華海天長嘯圖

海天不可極，海水空無垠。
懸崖孤嘯者，無乃蘇門人。
我夢游蓬萊，海竭原可燎。
麻姑黯欲悲，方平顧之笑。
仙境苟如此，塵寰安可居。
不如招鶴來，乘之游六虛。

微尚齋詩集卷四

五

題沈仲復織簾讀書圖

高華玉堂客，乃有山澤韻。
介然讀書心，窮達兩無悶。
卽今持使節，問俗到三晉。
取士報國家，無爲志肥遯。

東雲舫

驥馳一日爲里千，駑馬十駕須拊鞭。
半生刻意摹漢石，董侯落筆超吾前。
憶昔追隨子張子，海王邨肆時沿緣。
偶收異本歸障籠，隔宵預輟晨餐錢。
當時意氣可嘲噓，幾日蹤跡如雲煙。
張君墓上木已拱，我時方壯今華顛。
鍾期一逝賞音絕，十指久不親朱絃。
因君頓觸舊時好。

更拂蛛網開塵編怪君趨公勞且賢寂寞正似吾當年
將無嗜好與時背有似柄方逢鑿圓董侯董侯勿聊此
勤覲兔豪書院體

次韻答霞舉

愁病侵尋百事乖變遷真似橘踰淮尊前已抱三秋感
別後能禁兩地懷車馬艱難疏近局琴書斥散怯空齋
閉關自笑成癡絕日就明窗寫折釵

戲柬霞舉

心如飛絮沾泥滓捲地東風忽吹起朝官補外古所歎
賀客喧闐童僕喜王程敦迫敢淹畱客路餽糧容料理

微尚齋詩集卷四

三

平生性懶強趨走日犯炎歊整巾履今年霖雨得閉門
廿載優閒安有此誰令千里行觸熱歸謁三醫病粗已
文非韓子窮難送詩媿陶公酒先止中秋重九看又近
空把霜螯覺無俚王郎百事遠過我飲社獨客先屈指
卽今此事欲代興高築糟邱傲餘子始知稟受分苦齋
戴角未成翻去齒君如迫以城下盟破戒從君執鞭弭
完貞伏虎圖爲翔雲題

黃子今世人貌古心亦古人笑元章顛我覺魏徵嫵芝
醴有根源英靈在寰宇畫圖示先烈哀懦爲起舞卓哉
談孺人高義繼嬰杵一躍逐波濤羣謀未消阻危辭告

亡靈冤淚漬墳土。死易存孤難。殺身誠小補。艱虞出智
勇。夷險慰甘苦。提抱兼眾難。倉皇守殘譜。半生昧庭屏。
千里走吳楚。曠野誰比隣。山君解人語。從來忠孝事宜。
有鬼神輔。嗟彼蚩蚩人。人心猛於虎。

秋懷八首次研秋韻

宵暑不成寐。苦憶秋夜長。元陰倏悽慄。忽復思炎光。人
情有欣厭。天運惟故常。三舍儻終返。甯辭爲魯陽。
飛蟲投破窗。繁響亂階滴。寸心叢百憂。一鏡明四壁。俄
成故山夢。月白萬松碧。舟載宦何成。蹉跎負泉石。
狙公芋三四。籠物但小數。大造簸羣生。誰能解其故。丈

微尚齋詩集卷四

三

夫要磊落兒女。乃悲訴百歲。能幾何。乘時觀所樹。
平生萬卷書。不惜破產求。飢寒一朝迫。決棄如仇讐。一
室不自保。遑知四海憂。忘情學蟪蛄。蒼然春復秋。
憂患困懷抱。捷中如抵巇。豈暇憂未來。卽境生然疑。造
化頓挫我。焉知非福基。君看歲寒松。不爭桃李時。
眾人夸疾走。捷足甯渠非。蹇者自安步。乃獨與時違。違
時何足道。卻顧同行稀。大化日滔滔。況此微軀微。
陶公酒不足。齋恨到身後。我飲三十年。沈酣已云久。聖
賢固寂寞。飲者骨亦朽。客來勸舉觴。唯唯復否否。
秋氣易作悲。秋日常苦陰。寂寥容膝居。顛頓擁鼻吟。士

無濟世具安用抱此心中材涉末流貽歎不自今

將之廬州任畱別都門諸友

曹司廿六載垂老得一麾疏友為我賀親者還歔歔古
人出載質不為寒與饑末俗競華膻此義久已微嗟余
未聞道五十行知非匡時既無術引分胡不歸貧女晚
乃嫁羞言金縷衣

廬江昔雄郡今為狐兔穴五馬名雖榮智者固不屑平
生差自信惟恃愚與拙叱馭彼何人念此寸心熱況聞
大府賢戎幕萃奇傑安知肘後印不為書生設窮通非
一時達者觀晚節

微尚齋詩集卷四

朝入正陽門莫過宣武坊熟之如戶庭欲去情豈忘同
懷二三子道義相拂匡平時一樽酒及此為別觴班馬
懷故慙孤鴻思舊行我車一首途天末遙相望人生各
有事無為兒女傷

徽尚齋詩
續集一卷

同治甲子
仲秋隹成

辛酉秋洪洞董研秋檢討爲余刻微尚齋詩初集四卷
以十冊見贈攜以出都沿途親舊分乞未至皖已盡皖
中朋好索觀者尤眾乃取出都後所作錄爲續集一卷
倩工刻之並檢討所刻者亦重刻之聊代鈔胥之勞非
敢問世也同治甲子中秋日代州馮志沂識於廬州官
署

敘

一

微尚齋詩續集卷一

代州 馮志沂 魯川

辛酉八月以後作

苦陰

破牖天光淡，遙空雨氣沉。桑榆思舊暖，葵藿眩重陰。廢卷緣書細，呼車畏淖深。巡簷誰共語，百感暮蕭森。

讀研秋送霞舉詩有感賦呈霞舉

人生縱膠漆，理無百年聚。我行不可留，那復惜君去。西風作繁響，萬葉競辭樹。無怪居者心，探喉成怨句。

王子兵曹郎乃作諸侯客，強言名山遊。直為饑寒迫，吾

微尚齋續集卷一

聞和氏璧得一可當百，雖然恥迷邦，亦勿輕抵鵲。

奇雲不抱山，涌泉不擇地。寸心鬱萬怪，那不思一試。罕

虎帥以聽辭，宜乃相吏。古人去就三，但觀用者意。

壽陽昔持節，苗仙張州實依止。分金周管仲，開館禮荀

子。使者吾輩人，要當繼前軌。君行亦復佳，前言吾戲耳。

別少鶴

近局匆匆路阻長，相看吟鬢各滄浪。一官飄泊仍軍幕，

入口艱難且故鄉。客子欲行歌慷慨，故人臨別語悲涼。

可堪他日成追憶，團坐同依短燭光。

別齋居

浮生未合老京華。欲別齋居似別家。客夢尚隨雲北向，
宦情已似日西斜。愁邊砧杵催楓葉，病後樽罍負菊花。
爲問白仁無恙否，逝將投劾侶烟霞。

保陽贈賈小樵學使

君持使節出皇州，我困柴車息路陬。郡略同遷客，
去解裝聊喜故人留。緜袍寒甚憐張祿，逆旅蕭然愧馬
周。宦輒止分衣帶水，好將書札問沉浮。

旅感

自我十四五，七度踰茲山。山川不改色，遊子非故顏。
七尺將空囊，飄搖天地間。心產兩無恆，坐使廉夫頽折腰。

微尚齋續集卷一

二

羞五斗高躡不可攀，皋禹在廟廊乃容巢。許閒不然自
暇逸，誰當任其艱。濟世客一毛，楊朱誠乃慳。
雞號續蟲吟，車鐸鳴不已。繁聲欺旅聽，纖悉皆入耳。
長宵無完夢，味爽先眾起。朝暉射浮雲，萬態幻青紫。
平居慕畫圖，久客厭山水。穉子初遠遊，觸物盡驚喜。
眺嶺乍西顧，眎流復東指。愁跳誰能曠，我昔亦如此。

壽陽縣

四門過孤城起結轡，山川此一開。水勢下連汾，晉去
地形遙拱薊。燕來田廬未辦收，身計巖廟誰爲濟。世才
綠野裴公衰病久，旅人搔首望中台。

旅店用壁間韻懷都門故人

又是天涯一度秋。夢成搖落醒還愁。雲山有態慵開眼。
霜雪無情漸滿頭。但得林泉容嘯傲。那須卿相快恩讐。
故人京國如相憶。遙共西南月一鉤。

山行

村舍高低傍水涯。巉巖石徑偶停車。疏林敗葉黃於橘。
野草披綿白似花。稚子愛山如看畫。旅人投店當還家。
前途更較來程遠。塵滿初衣莫漫嗟。

晚行

石盡灘猶怒。山高日易昏。星河微辨路。燈火遠知村。作

微尚齋續集卷一

三

吏詩書賤辭家。僕隸尊團樂。空八口懷抱與誰論。

卽事

惘惘迷來路。迢迢問去程。晚烟將水暗。初月代霞明。稅
駕知何地。浮家任此生。還憐無褐者。擁柝耐寒更。

次韻答蘭洲

關山無際雪連天。暫醉金樽畫燭邊。燕鴈偶逢還遠別。
萍蓬重聚定何年。酒能作病行當止。詩或窮人莫浪傳。
招隱慚君深厚意。生涯未辦五湖船。

答戈礪侯表叔

戚誼高曾舊。交情骨肉真。與君同寂寞。憐我獨風塵。歲

暮難言別天高易愴神來宵官閣酒應念遠遊人

寄家兄

不惜歸來晚其如決去何回思旬日聚只作等閒過夜
火明孤店長冰坼大河衰門鮮兄弟垂老別離多

陝州道中憶家兄

青山行盡見平蕪殘雪經冬半有無長路馬如人意懶
中天月似客心孤儻容謝病歸三徑便合辭家向五湖
忽憶今宵東雍客一窗燈火夢征夫

十二月十九日宿汝州

視草金鑾夢已休買田陽羨願難酬浮蹤偶復成佳話

微尚齋續集卷一

四

坡老生辰宿汝州

槐店阻凍

連宵鳴櫓息謳啞西北風多凍轉加宿酒半醒寒夜永
短篷殘燭夢京華

壬戌

上賈運生中丞

我過中年領郡麾公今身已繫安危半生未改狂奴態
一顧空慚國士知豈意戟門操版日還如京邸論文時
浮雲得失何須道相見惟應倒玉卮

誓眾登陣氣凜然梯衝百道一城堅此時過客猶心悸

當日孤臣豈意全。召虎未聞圭瓚賜。樂羊翻有謗書傳。
八公草木還風鶴。未可東山聽管絃。

潁州道中

征塵猶薊北。旅宿已淮西。倦客驚烽火。居人習鼓鼙。夢
中燕樹迴。愁外楚天低。漂泊慚身世。林昏鳥亦栖。

泝潁

暫拋麻紙牘。來試木蘭橈。春岸碧無際。暮霞紅不銷。悶
憐吟侶隔閒愛。水程遙。明發聽官鼓。還應事折腰。
擁岸千章樹。憑虛一葉舟。波平帆影直。風緩舵聲柔。野
性元麋鹿。忘機且鷺鷗。只憐清潁水。何計卻西流。

微尚齋續集卷一

舟中答小袁賀初度

與君同甲戌。數月忝爲兄。漫作飄蓬客。偕來細柳營。關
河身漸老。烽火夢頻驚。幕府容投劾。還期事耨耕。
故里同懷隔。京華舊侶違。一官仍是客。三徑未成歸。逆
水行猶住。來帆疾似飛。平生弧矢意。四十九年非。

答小袁書懷

塞上青油幕。軍中白玉卮。空憐才似錦。不柰鬢成絲。失
馬庸非福。亡羊又有岐。惟應將健在。飛札報親知。
陶令腰全折。張儀舌僅存。未堪追國士。聊似飯王孫。局
促難行意。蹉跎悔受恩。先生旣無好。何事盍嘗門。

戲贈善相人孫小雲大令

孫君作吏行猶儒。勸人以善言。姝姝偶策。未來每奇中。
恐是昔時唐。舉徒顧我不。讀子卿書。請質所感。聊軒渠。
尼山萬古無匹亞。何物陽虎同眉鬚。漢高子孫盡。隆準。
建安不免更黃初。夷甫縱能殺石勒。東晉豈不生五胡。
亞夫鄧通等。餓死但視縱。理無賢愚。貌同鄙。陽蕭穎士。
身外長物惟一奴。武襄狀類宋藝祖。竟以憂畏終其軀。
我生自許良已審。誓挂衣冠歸荷鋤。亦嘗以命詆日者。
聽其夸誕為戲娛。知君樂此有深意。元非挾術遊江湖。
正如君平在下肆。欲以慈孝端時趨。神道設教古則有。
先生志大計已迂。我有前知非矯誣。百歲風燈不須與。
先生與我俱黃墟。

微尚齋續集卷一

六

送別萬健菴時將之黃莘農中丞粵東幕且以便道歸

省

半載同軍幕。浮淮更入秦。不堪為客日。卻羨遠遊人。過
嶺酬知己。還家慰老親。去逢黃叔度。為我話艱辛。

秦嶺遇雪

危途緣峭壁。盤屈僅如帶。其下千仞淵。坡陀傾向外。我
來值新霽。雨具未夙戒。浙瀝初牛毛。翩翻俄鳥毳。計日
方深秋。寒凜吁可怪。天時疑舛互。地氣尤狡獪。突兀層

冰中飛流倏澎湃。方行泥淖途頓入。晶玉界連峯混太。
虛積氣迷大塊。翻驚跬步閒。便與溟渤會奔雲。赴高巖。
綫路遭塞兌。我馬慄不前。鞭之頻卻退。荆榛密糾結。十。
步八九礙。不辨石與冰。喧呼雜碾磔。情知下有地。墜死。
尸骨在。魂搖難自持。力盡不敢懈。顛狂昌黎哭。偃僕元。
章拜。從行三四人。咫尺迷暗對。延緣見村舍。驚喜聞警。
欵父老爲我言。山中苦陰晦。早年八九月。晴日時一曬。
平原偶輕陰。茲地仍霪鬱。雨雪之所居。人自入其內。山。
民習已慣。客子甚矣憊。疾走下林麓。晴郊歷如繪。簡視。
童僕存。始知身有屈。丈夫志許國。頂踵非所愛。要當親。
矢石。未忍葬溝洿。茲遊信奇絕。吾意不可再。挑燈改新。
詩。醉語聊一快。

微尚齋續集卷一

七

有感用都中與少鶴霞舉唱和韻

平生重然諾。未敢許人死。魯連非有求。胡爲久居此。出。
都逾一年。聞見彌譎詭。有術事公卿。無顏對妻子。灼知。
官九遷。不若仕三已。民間萬疾痛。旦夕望申理。甯知九。
重上所見。惟奏紙。誰能舍所學。與公爲怒喜。鄙忌盛賓。
客徐公。失其美。政恐難自堪。朝來明鏡裏。

潼關旅望

平生無夢到侯王。癡願終成不自量。四海幾人安隴畝。

一身容汝老耕桑。天邊雲樹牽歸興。日下交親斷報章。
薄暮登樓望鄉國。朔風吹鴈作斜行。

詠史

王翦求秦宅。廉頗憶趙人。時來俱報主。事去或危身。貴
賤論交態。機權鑿性真。淮陰如學道。原不愧純臣。

渡河二首

淮西荒艸接天涯。甬谷西來益可嗟。喜見承平舊村落。
寒林疏處徧人家。秦置殘破晉置危。一水賢於十萬師。終異承平舊村落。
疏林斜日見旌旗。

微尚齋續集卷一

題旅店壁

豈有豪懷慕請纓。無端縛袴學長征。漫思歸路喧笳鼓。
差免彈章挂姓名。野店荒荒如敗寺。行人草草似逃兵。
儒生潦倒尋常事。關隴烽煙望早平。

癸亥

題歐陽高孺人傳後

古人重節義。今人重功名。豈知功名事。端賴節義成。忠
憤苟不作。寇難何由平。軍興餘十載。羣盜方縱橫。君家
六一翁。有言明且清。酒肴爲善將。循默乃名卿。文忠原句幕
府巧爲奏。輿臺多擁旌。誰能趙璧返。坐視越甲鳴。如何

呼殺賊乃在中。櫛英願君勿哀逝。逝者長如生。勉旃奮
雄略。一洗潢池兵。毅魄定有知。重泉亦歡情。

陳州道中讀逆旅題壁有感

嘗憶老氏言。民蓋不畏死。何況鞭朴歟。瑣瑣乃及此。終
是豈弟人。溫言徧閭里。但勸急輸將。未忍遽敵比。雖云
言感人。哀矜差勝翹。首問蒼天喪。亂曷遄已。溯自庚
辛來。軍興逾一紀。萑苻魁桀徒。所在揭竿起。遺黎盡良
懦。延息待鞭箠。軍食所取資。秦晉豫蜀耳。三秦土半焦。
兩川兵未弭。赫赫舊神州。完土今餘幾。此亦兵燹餘。瞿
然念桑梓。

寄懷健菴

征西幕府散風沙。一士飄零豈足嗟。送客繞朝空贈策。
去秦蘇季未還家。我來淮上麥初實。君到嶺南梅已花。
鈴下若能相問訊。爲言顛頓憶京華。

五十自壽

華髮森森欲滿顛。懸弧已是杖家年。旅愁聊付三升酒。
歸計猶虛二頃田。流轉兵間如避地。蒼茫生事更憂天。
圍城不去無長策。莫訝將軍笑魯連。

去歲扁舟泊壽春。一塵今作漆園民。觀魚未省濠間樂。
化蝶頻忘夢裏身。縱有功名驚里老。應無祿養到亡親。

白仁山色青無恙欲乞蒲團悟夙因

閔蝗

蝗初生股未有翼結陣渡河河爲黑四鄉今年禾已空
嗟爾蝗來欲何食蒙城城外皆賊壘此賊之初亦民耳
假名攫取民膏脂以餘丐官官庇之朝廷章服不屑
受卻去官號稱民師我聞此賊未虎嘯豐年糴糧荒不
糴匹夫聚粟安用多當時環視無敢呵一朝糧足揭竿
起卻遣良民饑荷戈蝗乎勿食田所有賊巢之中粟紅
朽

後從軍行寄都中故人

微尚齋續集卷一

十

自我去京華紀歲歷辛癸燕晉秦楚間展轉行未已譬
如旋磨馬自謂日千里停策發其蒙恍然身在此京華
多執友居第皆尺咫退食共一樽商量徧文史閒復憶
鄙人到郡今久矣願得布所懷因風託雙鯉頗嘗涉孫
吳談兵憑故紙焉知所聞見一一不相似賊來民望兵
兵來民望死嘗疑賊雖多盡殺應可止歐民日爲賊正
恐無盡理官豈皆無良事或不在已昨聞兩縣令被判
等羊豕粵賊雖讐官猶問政臧否此賊之所讐厥意甚
難揣一例號忠魂千年作冤鬼曩時召亂者肥家長孫
子憂憤逾萬端所言毫末耳去年走賊中蒼黃涉潁水

謬逢賞音人采葑及下體大帥殊桓桓羣寮亦濟濟匪
材蝨幕下眾意固不喜初蒙虞人招旋輟穆生醴聊能
忍須臾那復論媿取客或爲我言適己荷殊禮漸感推
解恩稍安箕踞洗十月藍關行饑腸風雪裏平沙藉衣
卧筯篔快難比陳琳苦絃上毛遂羨囊底鄙人身所遭
言之汚吾齒

感興

見說窮鄉盼大軍壺漿老幼集如雲忘機乍覺人無患
不戢俄驚火自焚莫擁明妝方縱酒晨頒勇爵又書勳
可憐兒女啼號地主將遙遙那得聞

微尚齋續集卷一

十一

慚愧青油幕下身經年東楚復西秦挽回風氣真無術
孤負恩私大有人渠帥論才唯怒喜寒儒報國在清貧
定知不是封侯相誓返漁樵作幸民

中朝言路日宏開晴晝碎匄走怒雷應略傳聞求實事
莫教彈射到良材兵機尙復紉窮寇謹議何當溺死灰
舊失牙冠今不恨免將白簡爲人裁

揭竿制梃靖萑苻四十男兒上大兔死未聞烹信越
狐鳴何意效陳吳預知反相言終驗強學推心計已迂
驅迫羣愚同浩劫縱懸鼠首得償無

題汪芾亭司馬詩集

我坐詩窮君更甚。叢殘行卷劫灰餘。直緣結習難湔洗。那計才名有折除。泥飲共憐生計薄。耽吟終恐世情疏。一枝可借同棲泊。聊喜馮驩食有魚。

送別吳桐雲觀察

我來君又去。況復未銷兵。羣帥虛前席。中朝熟盛名。縱甘歸白髮。持底謝蒼生。獨客傷離索。無言對短檠。

讀史二首

魏冉相秦國。厥功蓋不訾。范叔欲其印。攘臂起奪之。自快彼恩怨。豈計秦安危。杜郵一賜劍。中心亦危疑。剛成來效尤。天道固若茲。

微尚齋續集卷一

三

翁子縱衡才。學古緣利祿。引懷見印綬。意態一何俗。長史事丞相。分在豈云辱。不為鴻鵠翔。乃肆蜂蠱毒。政使老負薪。未必不為福。

旅况

薛荔遮牆屋。蓋茅廣庭岑。寂似荒郊略。芟荆棘成三徑。差勝冰霜走二嶠。薄宦已同蝸。上壁故人頗勸燕營巢。年來嬾過稽中散。不為山公論絕交。

題畫菊

西風滿地亂蟲吟。露冷霜寒瘦不禁。千載柴桑人寂寞。傍誰籬落又秋深。

漫興

唐朝左計召西戎貽患千年苦未終隴坂腥臊連渭北
甘泉烽火照河東誰爲陰雨綢繆計但課焦頭爛額功
今日黃流是天塹防邊諸將漫匆匆
蒲坂平陽古帝都祇今溝瘠未全蘇天南兵火通三輔
海內金錢仰一隅大賈家費空簿籍疆臣長策在追呼
還愁杼軸俱空後虛費司農霹靂符

感事

詞曹三十受專征海內爭傳百戰名美酒葡萄歡未極
明珠薏苡謗旋生臺章豈盡緣功罪槃水終當感

微尚齋續集卷二

三

聖明長使英魂難瞑日關西羣盜尙縱橫

十年介冑逐黃中三疏風霜動紫宸讞牘尙致持
八議天恩未必棄孤臣不除意氣原非福能捍封

疆豈在貧手薦孤寒逾八百崖州垂淚更無人

壽滌生相國

十年兵氣黯潢池半壁東南一木支諸葛自堪興禮樂
汾陽早已係安危欲摹日月誠知陋競頌岡陵豈爲私

愧我心香虔熟久未隨參佐捧華扈

樓船楚尾下吳頭千里風煙百戰收

明詔特開新

幕府元臣重奠舊神州良平計畫推蕭相李郭勳名

恃鄰侯綠野他年容侍飲願將高詠繼韓劉

天教耆德佐中興

列聖威靈此式憑黃閣已看

鄰紫極白頭還喜對青燧名高華裔心彌下事迫艱危

氣轉增曾爲奪情頻抗疏莫將功業擬江陵

宣城詩變昔經過廿載流光等逝波所恨吳門歸老卒
不看使相奮天戈文傳通子知能繼劍與徐君未足多
感舊憐才無限意欲言訓報鬢先皤

寄子明

人生異稟受了不關愚賢今者吾與子偶爲天所憐宗
袞貳儀部子壯初遊燕竹林得三十序齒相蟬聯鼎足

微尚齋續集卷二

十四

一個弱少者今華顛子乃肩卑位笠尉名翩翩奉養白
頭親差不愧俸錢卿叔亦大癡豚蹄望豐年爲郎百不
遇垂老得箴遷虛名忝郡寄經歲從戎旃大帥甚貴倨
使勢呼觸前性命忍須臾肝腸鎮烹煎世人初不知饑
鳴嚇雛鷓楚宋鄭韓秦磨蟻不自旋所遭備奇詭九死
終一全草堂春江色雙鯉爲我傳子歌濤嶺雲我憶常
谿泉何時共明燭兩交顏蒼然勅婦具酒漿呼兒進詩
篇此豈復奢願更籲滄浪天

琴南遊山覩得乳泉手汲歸與同人墜之卽事有作
年來詩腸灑塵土自誦拈毫無俊語多君躡屩入荒山

覓得山泉手親煮初聞篁徑度微風旋覺荷池喧急雨
霍山新蒨柳芽色照映花蠶如潑乳憶我去年走渭南
渴飲燔啣氣難吐人骸蔽井水殷赤提以羸餉十存五
攢眉閉目忍一啜猶似瓊漿沁心腑今年仍復客軍中
此樂甯非天所與更煩健步汲盈甕收取中冷入庭宇
置符無事仿坡翁卻羨茲鄉俗醇古

志侯齋



微尚齋續集卷一

